

四庫全書

經部

欽定四庫全書

詩傳通釋卷十二

元 劉瑾 撰

詩

朱子集傳

小旻之什二之五

旻天疾威敷于下土謀猶回遘

音遘

何日斯沮

在呂反

謀臧

不從不臧覆用

叶于反

我視謀猶亦孔之邛

其凶反

賦也。旻幽遠之意，敷布猶謀，回邪通僻，沮止臧善，覆

反邛病也。大夫以王惑於邪謀，不能斷以從善，而

作此詩言旻天之疾威布于下土，使王之謀猶邪僻

無日而止。

愚按此章稱天之意猶可見君臣隱韓之義，天人合一之理。

謀之善者

則不從，而其不善者反用之，故我視其謀猶亦甚病

也。

輔氏曰：昏亂之世，君臣上下謀猶邪僻，無有沮止之者，故無所歸咎而歸之天也。夫為國者固不可

以無謀猶也。然觀其於謀之善者，則不從其不善者，則反用之，則我已甚病矣，不待其謀之敗而禍之來也。

滄滄

許急反

訛訛

音紫

亦孔之哀

以於希反

謀之其臧則具是

違謀之不臧則具是依我視謀猶伊于胡底

之廢反叶都黎反

賦也滄滄相和也訛訛相詆也具俱底至也言小

人同而不和其慮深矣

前漢劉向曰言衆小在位而從邪議歛歛相是而背君子

然於謀之善者則違之其不善者則從之亦何能有所定乎

我龜既厭不我告猶

叶于救反

謀夫孔多是用不集

韓詩作就

叶疾救反

發言盈庭誰敢執其咎

叶巨又反

如匪行邁謀是用不

得于道

叶徒侯反

賦也集成也 卜筮數則瀆而龜厭之故不復告其

所圖之吉凶謀夫衆則是非相奪而莫適所從故所

謀終亦不成蓋發言盈庭各是其是無有任其責而

決之者

輔氏曰洪範曰謀及卜筮夫謀貴乎博故謀及卿士謀及庶民今乃以謀夫孔多是用不

集者蓋彼之所謂謀不過盡衆人之情而主之者則一人而已而此之所謂謀夫則是各主其謀故是非相奪莫知適從所以其謀終亦無所成就也發言盈庭誰敢執其咎此亂世為謀之常態上無聽言之明則人人得以肆其說而已亦終莫能決其是非故無肯任其成敗之責者

猶不行不邁而

坐謀所適謀之雖審而亦何得於道路哉

孔氏曰謀而不行則

於道不進言而無
決則於事不成

哀哉為猶匪先民是程匪大猶是經維邇言是聽

叶平

聲

維邇言是爭

叶側
陴反

如彼築室于道謀是用不潰于成

賦也先民古之聖賢也

孔氏曰民者人之大
名其實是聖賢也

程法猶

道

愚按詩中猷猶字通用故前章猶訓謀此訓
道而猷猷與秩秩大猷又皆作猷亦訓道

經常

潰遂也

言哀哉今之為謀不以先民為法不以大

道為常其所聽而爭者皆淺末之言以是相持如將

築室而與行道之人謀之人人得為異論其能有成

也哉古語曰作舍道邊三年不成蓋出於此

國雖靡止或聖或否

方九反叶
補美反

民雖靡盬

火吳反

或哲

或謀

叶莫徒反

或肅或艾

又音

如彼泉流無淪胥以敗

叶蒲寐反

賦也止定也聖通明也撫大也多也艾與又同治也

淪陷胥相也言國論雖不定然有聖者焉有否者焉

民雖不多然有哲者焉有謀者焉有肅者焉有艾者

焉但王不用善則雖有善者不能自存將如泉流之

不反而淪胥以至於敗矣聖哲謀肅又即洪範五事

之德豈作此詩者亦傳箕子之學也與

輔氏曰子曰十室之邑必

有忠信天下豈有無才之世哉故告之以國論雖未
定而人民之中有聖與否者焉人民雖不多而有哲
謀肅父者焉但惠王不能用之耳王不能用則雖有
是五者之才皆將如泉流之不反而相與淪陷於敗
故以是戒王庶其能愛護而扶持之無使至於此極
也由是觀之則作是詩之大夫其心量之廣大志慮
之深長學問之博洽皆可見矣櫟此章及第三章則
其有得於箕子之學蓋深矣愚按箕子陳洪範九
疇其二為貌言視聽思之五事貌之德恭而作肅言
之德從而作又視之德明而作哲聽之德聰而作謀
思之德審而作聖其次叙與此不同者彼以
人事發見先後有序此則便文以叶韻耳

不敢暴虎不敢馮

皮冰反

河人知其一莫知其他

湯河反

戰戰兢兢如臨深淵

叶一均反

如履薄冰

賦也徒搏曰暴徒涉曰馮如馮几然也戰戰恐也兢兢戒也如臨深淵恐墜也如履薄冰恐陷也衆人之慮不能及遠暴虎馮河之患近而易見則知避之喪國亡家之禍隱於無形則不知以為憂也故曰戰戰兢兢如臨深淵如履薄冰懼及其禍之詞也

小旻六章三章章八句三章章七句

蘇氏曰小旻小宛小弁小明四詩皆以小名篇

所以別其為小雅也。其在小雅者，謂之小故。其在大雅者，謂之召旻。大明獨宛弁闕焉。意者孔子刪之矣。雖去其大，而其小者猶謂之小。蓋即用其舊也。

大夫刺幽王也

宛

於阮反

彼鳴鳩翰

胡旦反

飛戾天

叶鐵因反

我心憂傷，念昔先

人，明發不寐，有懷二人。

興也。宛，小貌。鳴鳩，斑鳩也。

陸璣曰：似鵲。鵲項有綉文。

翰，羽戾至也。

明發謂將旦而光明開發也二人父母也 此大夫

遭時之亂而兄弟相戒以免禍之詩故言彼宛然之

小鳥亦翰飛而至于天矣則我心之憂傷豈能不念

昔之先人哉是以明發不寐而有懷乎父母也言此

以為相戒之端

輔氏曰兄弟相戒以免禍則發言而首及於父母者宜也

人之齊聖飲酒溫克彼昏不知壹醉日富

叶筆力反

各敬

爾儀天命不又

叶夷益反

賦也齊肅也聖通明也克勝也富猶甚也又復也

言齊聖之人雖醉猶溫恭自持以勝所謂不為酒困也彼昏然而不知者則一於醉而日甚矣於是言各敬謹爾之威儀天命已去將不復來不可以不恐懼也時王以酒敗德臣下化之故此兄弟相戒首以為

說輔氏曰時人方化上所為昏亂於酒則此兄弟相戒而首及於此者亦宜也昏亂於酒則必自喪其威儀故相戒各自敬謹我身之威儀天命不又蓋言不可恃天命之常如此會有禍亂生也人能敬我身之威儀則能敬天矣天豈在外哉此義精矣王介甫曰戒以各敬爾儀天命不又言各則并戒其君臣也

中原有菽

音叔

庶民采

叶此禮反

之螟

音冥

蛉

音零

有子螺

音果

贏

力果反

負

叶蒲莢反

之教誨爾子式穀似

叶養里反

之

興也中原原中也菽大豆也螟蛉桑上小青蟲也似

步屈螺贏上蜂也似蜂而小腰取桑蟲負之於木空

中七日而化為其子

釋文曰螺贏即細腰蜂注曰雖名土蜂不就土中為窟

本草

謂捷土作房耳細腰物无雌皆取青蟲教祝變成已子嘗折窠而視之亦生子如半粟米太所負蟲却在

子下捷音連祝音呪

式用穀善也

中原有菽則庶民采之矣

以興善道人皆可行也螟蛉有子則螺贏負之以興

不似者可教而似也教誨爾子則用善而似之可也
善也似也終上文兩句所興而言也戒之以不惟獨

善其身又當教其子使為善也

輔氏曰善道人皆可
行不似者可教而似

同一秉彛故也兄弟相戒以免禍而上念
其父母下慮及其子則其意可謂懇至矣

題

大計反

彼脊令

音零

載飛載鳴我日斯邁而月斯征夙

興夜寐無忝爾所生

叶桑
經反

興也題視也脊令飛則鳴行則搖載則而汝忝辱也

視彼脊令則且飛而且鳴矣我既日斯邁則汝亦

月斯征矣言當各務努力不可暇逸取禍恐不及相

救恤也夙興夜寐各求無辱於父母而已

輔氏曰以脊令之載

飛載鳴興兄弟各有所進之道雖或不同然俱求無辱於父母可也先生嘗因人讀詩而務使不予細戒之曰今人看文字敏底一揭開版便曉但於意味却不曾得而今便只管看時也只是恁地但百遍自是強五十遍時二百遍自是強一百遍時題彼脊令載飛載鳥我日斯邁而月斯征夙興夜寐無忝爾所生這箇看時也只是恁地但裏面意思却有說不得底解不得底意思却在說不得底意思裏而

交交桑扈

音戶

率場啄粟哀我填

都田反

寡宜岸宜獄握

粟出卜自何能穀

興也交交往來之貌桑扈竊脂也俗呼青背肉食不

食粟

孔氏曰俗呼青雀喜盜脂膏食之因以名云埤雅曰桑扈有二種青質者背曲食肉好盜脂膏

素質者其翅與領皆有文章所謂率場啄粟有驚其羽者也呂東萊曰淮南子云馬不食脂桑扈不食粟

與瘕同病也岸亦獄也韓詩作犴鄉亭之繫曰犴

愚按

字書犴一作豻豻胡地犬也野犬所以守故謂獄為犴

朝廷曰獄

扈不食粟

而今則率場啄粟矣病寡不宜岸獄今則宜岸宜獄矣言王不恤鰥寡喜陷之於刑辟也然不可不求所以自善之道故握持其粟出而卜之曰何自而能善

乎言握粟以見其貧窶之甚

輔氏曰貧窶如是而猶不忘所以自善之道然

後為君子也

溫溫恭人如集于木惴惴

之瑞反

小心如臨于谷戰戰

兢兢如履薄冰

賦也溫溫和柔貌如集于木恐隊

墜也如臨于谷恐

隕也

輔氏曰哀亂之世賢人君子雖无罪猶恐懼輔氏曰溫溫恭人惴惴小心皆指他人言也戰戰

兢兢則自謂也言今處亂世溫溫柔恭敬之人則如集于木而恐墜也惴惴小心之人則如臨于谷而恐隕

也我其可不戰戰兢兢如履薄冰哉

小宛六章章六句

此詩之詞最為明白而意極懇至說者必欲為刺王之言故其說穿鑿破碎無理尤甚今悉改

定讀者詳之

漢氏曰此詩兄弟相戒之辭或是其人嘗有酒德之敗序謂刺王非

矣感念存沒意極懇至每誦之令人悲愴輔氏曰一章言思念父母以發相戒之端二章言時俗所習以致相戒之意三章則相戒相勉以教其子四章則欲各自努力以無遺父母之羞其意可謂懇至矣五章則又言王不恤貧困鰥寡如我之病因孤獨當今之世或不免於羅織之禍故握粟出卜以求自善之道六章又言當世賢者尚且兢畏如此況我則又當如何哉

大夫刺幽王也

此詩不為刺王而作但兄弟遭亂畏禍而相

戒之詞耳

弁

薄干反

彼鸞

音

斯

叶先齋反

歸飛提提

是移反

民莫不穀我獨

于惟何辜于天我罪伊何心之憂矣云如之何

興也弁飛拊翼貌鸞雅鳥也小而多羣腹下白江東

呼為鵲

匹又音卑

烏斯語詞也

孔氏曰猶鵲彼蕭斯苑彼柳斯

提提羣飛

安閒之貌穀善懼憂也舊說幽王太子宜臼被廢

而作此詩言弁彼鸞斯則歸飛提提矣民莫不善而
我獨于憂則鸞斯之不如也何辜于天我罪伊何者
怨而慕也舜號泣于旻天曰父母之不我愛於我何

哉蓋如此矣

輔氏曰怨者怨咎已之不得其親慕者思慕其親不能忘也問伊川謂小弁

之怨與舜不同何也曰舜之怨反諸身以求其所未至小弁則自以為無罪矣此其所以不同也歟問此詩只我罪伊何一句與舜於我何哉之意同至後面君子秉心維其忍之君子不惠不舒究之分明是怨其親却與舜不同曰作小弁者自是未到得舜地位蓋亦常人之情耳只我罪伊何上面說何辜于天亦似自以為無罪相似未可與舜同日語也
心之憂矣云如之何則知其

無可奈何而安之之詞也

踧踧

徒歷反

周道

叶徒苟反

鞠

九六反

為茂草

叶此苟反

我心憂傷

惄

乃歷反

馬如擣

丁老反叶丁口反

假寐永嘆維憂用老

叶魯口反

心

之憂矣疚

丑覲反

如疾首

興也踧踧平易也周道大道也鞠窮惄思擣春也不

脫衣冠而寐曰假寐疚猶疾也 踧踧周道則將鞠

為茂草矣我心憂傷則惄焉如擣矣精神憤耗至於

假寐之中而不忘永歎憂之深是以未老而老也

疾如疾首則又憂之甚矣

謝疊山曰怒焉如擣深悲至痛如有物之擣其心也

事關心者夢中亦長吁故曰假寐永嘆憂愁多者年少而髮白故曰維憂用老孔氏曰疾首頭痛也輔氏曰維憂用老維憂能老人非特能老人也又能使人病故又繼之以疾如疾首頭痛最叵忍疾如疾首則其病甚矣

維桑與梓

叶獎里反

必恭敬止靡瞻匪父靡依匪母

叶滿彼反

不屬

音燭

于毛不離于裏天之生我我辰安在

叶此里反

興也桑梓二木古者五畝之宅樹之牆下以遺子孫

給蠶食具器用者也

愚按古者一夫受五畝宅二畝半在邑二畝半在田四圍牆下

植木桑以給蠶食梓以具器用然此民居之制也蓋託以起興耳

瞻者尊而仰之依

者親而倚之屬連也毛膚體之餘氣末屬也離麗也

裏心腹也辰猶時也

言桑梓父母所植尚且必加

恭敬況父母至尊至親宜莫不瞻依也

謝疊山曰桑梓父母所植

以遺子孫見其樹則思其人思其人則愛其樹所以必恭必敬也敬其桑梓豈敢忘其父母乎

然父

母之不我愛豈我不屬於父母之毛乎豈我不離

于父母之裏乎

孔氏曰太子為父所放爾并言母者以人皆有父母之恩故連言之

無所歸咎則推之於天曰豈我生時不善哉何不祥

至是也

謝疊山曰父母不我愛求其說而不可得於是歸之於天曰不知天生我之時我之日月

星辰果在何處吉歟凶歟不可得而知也韓文公詩予生之辰月宿南斗牛奮其角箕張其口即生辰所在也

苑

音

彼柳斯鳴蜩

音

嘒嘒

呼惠反

有淮

于罪反

者淵桂

音

葦

韋鬼反

淠淠

孚計反

譬彼舟流不知所戒

音戒

叶心之憂

矣不遑假寐

興也苑茂盛貌蜩蟬也嘒嘒聲也淮深貌淠淠衆也

屈至遑暇也

苑彼柳斯則鳴蜩嘒嘒矣有淮者淵

則桂葦淠淠矣今我獨見棄遂如舟之流于水中不

知其何所至乎

王介甫曰舟流者蕩漾而無所止也所謂若窮人無所歸也輔氏曰見物之大者無

所不容以興今王乃不能容其子使如舟之流於水中而無所屆何哉是以憂之之深

昔猶假寐而今不暇也

鹿斯之奔維足伎伎

其宜反

雉之朝雊

古豆反

尚求其雌

叶千西反

譬彼壞

胡罪反

木疾用無枝心之憂矣寧莫之知

興也伎伎舒貌宜疾而舒留其羣也雊雉鳴也壞傷

病也寧猶何也鹿斯之奔則足伎伎然雉之朝雊

亦知求其妃

配匹

蘇氏曰鹿走而留其羣雉鳴而求其雌物無不思於其親者今王

獨棄其子何哉 今我獨見棄逐如傷病之木憔悴而無枝是

以憂之而人莫之知也

輔氏曰以見夫物無不顧其親者以興已獨見棄逐如病

木之悴而無枝何哉其意又切於前章矣

相

息亮反

彼投兔尚或先

蘇薦反叶蘇晉反

之行有死不尚或

瑾

音覲

之君子秉心維其忍之心之憂矣涕既隕

音蘊之

興也相視投奔行道瑾埋秉執隕隊也

相彼被逐

而投人之兔尚或有哀其窮而先脫之者道有死人

尚或有哀其暴露而埋藏之者蓋皆有不忍之心焉

今王信讒棄逐其子曾視投兔死人之不如則其東
心亦忍矣是以心憂而涕隕也

君子信讒如或疇

市由反叶
市救反

之君子不惠不舒究之

伐木倚

寄彼反叶
居何反

矣析薪杝

救氏反叶
傷何反

矣舍

音捨

彼有罪

予之佗

吐賀反叶
湯何反

矣

賦而興也疇報惠愛舒緩究察也倚倚也以物倚其

巔也杝隋其理也佗加也

言王惟讒是聽如受疇

爵得即飲之

孔氏曰疇酬古字通用此喻
得讒即受而行之如旅酬也

曾不加惠

愛舒緩而究察之夫苟舒緩而究察之則讒者之情
得矣伐木者尚倚其巔析薪者尚隨其理皆不妄挫
折之今乃捨彼有罪之譖人而加我以非其罪曾伐
木析薪之不若也此則興也

莫高匪山

叶所
旃反

莫浚

蘇俊
反

匪泉君子無易

夷鼓
反

由言

耳屬

音燭

于垣無逝我梁無發我笱我躬不閱遑恤我後

賦而比也山極高矣而或陟其巔泉極深矣而或入
其底故君子不可易於其言恐耳屬於垣者有所觀

望左右而生讒譖也

問此四句莫是以上兩句興下兩句耶曰此只是賦蓋以為莫

高如山莫浚如泉而君子亦不可易而言亦恐有人聞之也陳少南曰王無輕發言小人之為讒者尚屬耳於垣壁間以窺伺之讒賊之生也亦伺君子之向背如何耳王於是卒以褒姒為

后伯服為太子故告之曰毋逝我梁毋發我笱我躬

不閱遑恤我後蓋比詞也

王介甫曰湯逝梁發笱者太子放逐而其憂終不忘

國也我躬不閱遑恤我後者無如之何自決之辭

東萊呂氏曰唐德宗將廢

太子而立舒王李泌諫之且曰願陛下還宮勿露此

意左右聞之將樹功於舒王太子危矣此正君子無

易由言耳屬於垣之謂也小弁之作太子既廢矣而

猶云爾者蓋推本亂之所由生言語以為階也

輔氏曰此

章則總其始終言之中后之黜宜白之逐雖主於褒如伯服之讒意者幽王之昏暴必先嘗世此意於言語之間故其左右得以附會而成之自古如是多矣東萊先生以為推本其亂之所由生言語以為階者是也無逝我梁以下四句則事已決後絕意之辭耳

小弁八章章八句

幽王娶於申生太子宜臼後得褒姒而惑之生

子伯服信其讒黜申后逐宜臼而宜臼作此以自

怨也序以為太子之傳述太子之情以為是詩不知

其何所據也傳曰高子曰小弁小人之詩也孟

子曰何以言之曰怨曰固哉高叟之為詩也

固謂

執滯不通也
為猶治也

有人於此越人關弓而射之則已

談笑而道之無他疏之也其兄關弓而射之則

已垂涕泣而道之無他戚之也小弁之怨親親

也親親仁也

親親之心
仁之發也

固矣夫高叟之為詩也

曰凱風何以不怨曰凱風親之過小者也小弁

親之過大者也親之過大而不怨是愈疏也親之過小而怨是不可磯也愈疏不孝也不可磯

亦不孝也

磯水激石也不可磯言微激之而遽怒也

孔子曰舜其至

孝矣五十而慕

言舜猶怨慕小弁之怨不為不孝也趙氏曰生之膝下一體而

分喘息呼吸氣通於親當親而疏怨慕號天是以小弁之怨未足為愆也

張南軒曰小弁怨

慕乃所以為親親故引關弓之疏戚為喻以見其為親親者焉

凱風之作則以母氏不安于室

而已七子引罪自責以為使母之不安則已之故辭氣不迫蓋與小弁異也

當小弁之事而怨

慕不形則是漠然而不知者也

當凱風之事而遽形於怨則是激於情而莫遏也此則皆失親

親之義故皆以不孝斷之於是舉舜之孝以為法焉高子徒見小弁之怨遂以為小人之詩不即其事而體其親親之心亦可謂固矣

序刺幽王也太子之傳作焉

此詩明白為放子之作無疑但未有以見其必為宜臼耳序又以為宜臼之傳尤不知其所據也

悠悠昊天曰父母且

子餘反

無罪無辜亂如此憮

火吳反

昊

天已威

叶紆胃反

予慎無罪

叶音悻

昊天泰憮予慎無辜

賦也悠悠遠大之貌且語詞憮大也已泰皆甚也慎
審也 大夫傷於讒無所控告而訴之於天曰悠悠
昊天為人之父母胡為使無罪之人遭亂如此其大
也昊天之感已甚矣我審無罪也昊天之感甚大矣
我審無辜也此自訴而求免之詞也嚴氏曰首章傷已被讒也

亂之初生僭

側蔭反

始既涵

音含

亂之又生君子信讒君

子如怒

叶奴五反

亂庶遄

市專反

沮

慈呂反

君子如祉

音耻

亂庶遄

已

賦也僭始不信之端也

鄭氏曰僭不信也

涵容受也君子指

王也遇疾沮止也社猶喜也

言亂之所以生者由

讒人以不信之言始入而王涵容不察其真偽也亂

之又生者則既信其讒言而用之矣君子見讒人之

言若怒而責之則亂庶幾遏沮矣見賢者之言若喜

而納之則亂庶幾遏已矣今涵容不斷讒信不分是

以讒者益勝而君子益病也蘇氏曰小人為讒於其

君必以漸入之其始也進而嘗之君容之而不拒知

言之無忌於是復進既而君信之然後亂成

嚴氏曰次章言

亂生於讒讒生於優柔不斷所謂懷狐疑之心者來讒賊之口持不斷之意者開羣枉之門也今忠讒不分是以邪正渾淆是非易位而亂天下也

君子屢盟

叶謨郎反

亂是用長

丁丈反叶直良反

君子信盜亂是

用暴盜言孔甘亂是用餒

音談

匪其止共

音恭

維王之邛

其恭反

賦也屢數

朔

也盟邦國有疑則殺牲歃

雲

血告神以

相要

腰

束也

周禮司盟註曰盟者書其辭於策殺牲取血坎其牲加書於上而理之有疑不

協也李迂仲曰考之春秋傳如伯有之亂鄭伯與其臣下盟蓋盟者生於君臣相疑而致也

盜指

讒人也

真氏曰讒人乘間伺隙以中君子如穿窬之盜然

言

君子不能已亂而屢盟以相要則亂是用長矣君子

不能聖

即韻註曰疾也

讒而信盜以為虐則亂是用暴矣讒

言之美如食之甘使人嗜之而不厭則亂是用進矣

李迂仲曰鼯鼠俗謂甘口鼠魯國之牛鼠食其角而不知以其口甘朝廷之寇亦鼯鼠乎觀此則孔甘之言豈不為亂然此讒人不能供其職事徒以為王之病而

已夫良藥苦口而利於病忠言逆耳而利於行維其

言之甘而悅焉則其國豈不殆哉

嚴氏曰三章言信讒致亂也愚按此

上三章先刺聽讒者
下三章則專刺讒人

奕奕寢廟君子作之秩秩大猷聖人莫之他人有心

予忖

七損反

度

鐸音

之躍躍

他歷反

覓

士咸反

兔遇犬獲

叶黃反

之

興而比也奕奕大也秩秩序也猷道莫定也躍躍跳

疾貌覓狡也奕奕寢廟則君子作之秩秩大猷則

聖人莫之以興他人有心則予得而忖度之

詩人所見極大

如此章本意則是惡巧言讒譖之人却以奕奕寢廟秩秩大猷起興便見其所見極大形於言者無非義理之極致也潘時舉對云此亦是先王之澤未泯禮儀根於其心故其形於言者自無非義理也而

又以躍躍兔遇犬獲之比焉反覆興比以見讒人

之心我皆得之不能隱其情也

輔氏曰躍躍有跳梁

跳梁恣事以害人自謂人莫得而知已也一旦遇智者臨之則其情偽顯露有不可得而隱者誠有似乎兔之躍躍而忽遇犬焉則無所逃矣嚴氏曰四章言已知讒人之情也

荏而甚染桑木君子樹

叶上反

之往來行言心焉數

所主

反之蛇蛇

以支反

碩言出自口

叶孔反

矣巧言如簧顏之厚

叶胡反矣

興也荏染貌桑木桐梓之屬可用者也行言行道

之言也數辨也蛇蛇安舒也碩大也謂善言也顏厚

者頑不知恥也 荏染柔木則君子樹之矣往來行

言則心能辨之矣若善言出於口者宜也巧言如簧

則豈可出於口哉言之徒可羞愧而彼顏之厚不知

以為耻也孟子曰為機變之巧者無所用耻焉其斯

人之謂與真氏曰儉巧之言悅可人聽如笙簧然使其知愧則不為矣愚按五章言讒人出言無耻也

彼何人斯居河之麋音無拳音無勇職為亂階叶居

既微且廋市勇反爾勇伊何為猶將多爾居徒幾音紀叶

何

賦也何人斥讒人也此必有所指矣賤而惡之故為

不知其姓名而曰何人也斯語辭水草交謂之麋

迂李

仲曰左氏所謂孟諸之麋是也

拳力階梯也

胛限

瘍

羊

為微腫足為

廔

孔氏曰郭璞云胛脚脰也瘍瘡也膝脰之下有瘡腫是涉水所為

猶謀將大也

言此讒人居下濕之地雖無權勇可以為亂而讒口

交關專為亂之階梯又有微廔之疾亦何能勇哉而

為讒謀則大且多如此是必有助之者也然其所與

居之徒衆幾何人哉言亦不能甚多也

嚴氏曰末章斥讒人而賤

惡之也輔氏曰東萊以為非特賤之且言其本亦易驅除特王不悟耳者是也四章五章言讒言之本不

難辨讒人之本不難除也

巧言六章章八句

以五章巧言二字名篇

刺幽王也大夫傷於讒故作是詩也

彼何人斯其心孔艱

叶居銀反

胡逝我梁不入我門

叶眉貧反

伊

誰云從維暴之云

賦也何人亦若不知其姓名也孔甚艱險也我舊說
以為蘇公也暴暴公也皆畿內諸侯也 舊說暴公

為卿士而譖蘇公故蘇公作詩以絕之然不欲直斥

暴公故但指其從行者而言彼何人者其心甚險胡

為往我之梁

歐陽子曰魚梁者古人營生之具詩屢言之

而不入我之門乎

既而問其所從則暴公也夫以從暴公而不入我門

則暴公之譖已也明矣但舊說於詩無明文可考未

敢信其必然耳

輔氏曰彼何人斯其心孔艱責之也而不為已甚之辭胡逝我梁不入我

門疑之也而猶有望之意伊誰云從維暴之云始
明言之而其情既不得而適然亦無怨懟之辭也可
謂忠厚矣

二人從行誰為此禍

胡果反

胡逝我梁不入唁我始者

不如今云不我可

賦也二人暴公與其徒也唁弔失位也言二人相

從而行不知誰譖已而禍之乎既使我得罪矣而其
逝我梁也又不入而唁我汝始者與我親厚之時豈
嘗如今不以我為可乎

彼何人斯胡逝我陳我聞其聲不見其身不愧于人

不畏于天

叶鐵因反

賦也陳堂塗也堂下至門之徑也

李寶之曰其北當階其南接門內雷

也

在我之陳則又近矣聞其聲而不見其身言其

蹤迹之詭祕也不愧于人則以人為可欺也天不可

欺女獨不畏于天乎柰何其諧我也

輔氏曰知其逝我梁逝我陳是

聞其聲而不入見我是不見其身故因其實而言之又以見蹤迹之詭祕是以人為可欺也人或可欺而天其可欺乎爾獨不畏于天而諧我如是也古人責人往往至天而極如雨無正所謂胡不相畏不畏于

天亦是
意也

彼何人斯其爲飄風

叶孚
惜反

胡不自北胡不自南

叶尼
反

胡逝我梁祗

音攪

支反

我心

賦也飄風暴風也攪擾亂也

言其往來之疾若飄

風然自北自南則與我不相值也今則逝我之梁則

適所以擾亂我心而已

爾之安行亦不遑舍

叶商
居反

爾之亟

紀力
反

行遑脂爾車

壹者之來云何其盱

況于
反

賦也安徐遑暇舍息亟疾盱望也字林云盱張目也

易曰盱豫悔

豫六三爻本義曰盱上視也陰不中正而近于四故六三上視于四而下溺于

豫宜有三都賦云盱衡而誥是也

愚按左太冲魏都賦云魏國先生乃

盱衡而誥曰云云註謂盱舉目大視也眉上曰衡謂舉眉揚目也

言爾平時徐行

猶不暇息而况亟行則何暇脂其車哉今脂其車則

非亟也乃託以亟行而不入見我則非其情矣何不

一來見我如何使我望爾之切乎

爾還而入我心易

以跂反叶以支反

也還而不入否難知也

壹者之來俾我祇也

賦也還反易說祇安也 言爾之往也既不入我門

矣儻還而入則我心猶庶乎其說也還而不入則爾

之心我不可得而知矣何不一來見我而使我心安

乎李迂仲曰亦以見護
譖之人愧不敢來也董氏曰是詩至此其詞益緩

若不知其譖矣

伯氏吹壎

況素反

仲氏吹篪

音池

及爾如貫諒不我知出

此三物以詛

側助反

爾斯

叶先齋反

賦也伯仲兄弟也俱為王臣則有兄弟之義矣樂器

土曰埴大如鵠子銳上平底似稱

去聲

鍾六孔

孔氏曰埴周禮

小師職作埴古今字異耳注云埴土為之

竹曰簾長尺四寸圍三寸七孔

一孔上出徑三分凡八孔橫吹之如貫如繩之貫物

也言相連屬

燭

也諒誠也三物犬豕雞也刺其血以

詛盟也

王介甫曰三物如鄭莊公令出犬雞級以詛射類考叔者毛遂取雞狗馬之血以盟也蓋

古盟詛如此孔氏曰詛小於盟左襄十一年季武子將作三軍盟諸倍閔詛諸五父之衢定六年既逐陽

虎盟國人于亳社詛諸五父之衢

伯氏吹埴而仲氏吹簾言其心

相親愛而聲相應和也與汝如物之在貫

孔氏曰與汝義如兄

弟和如壘麗勢相貫次比如物之相貫宣誠不我知而譖我哉苟曰誠不

我知則出此三物以誚之可也

爲鬼爲蜮

音域

則不可得有覩

王典反

面目視人罔極作

此好歌以極反側

賦也蜮短狐也江淮水皆有之能含沙以射水中人

影其人輒病而不見其形也

孔氏曰蜮如鼃三足陸璣云一名射影含沙射

影其瘡如疥角端曲如上弩以氣爲矢因水勢以射人俗呼水弩

鵝能食之

覲面見人之貌也好善也反側反覆不正直也

言汝為鬼為蜮則不可得而見矣女乃人也覲然

有面目與人相視無窮極之時豈其情終不可測哉

是以作此好歌以究極爾反側之心也

王介甫曰作此詩將以絕

之而曰好歌者有欲其悔悟之心焉爾

何人斯八章章六句

此詩與上篇文意相似疑出一手但上篇先刺

聽者此篇專責讒人耳王氏曰暴公不忠于君

不義于友所謂大故也故蘇公絕之然其絕之
也不斥暴公言其從行而已不著其譖也示以
所疑而已既絕之矣而猶告以壹者之來俾我
祇也蓋君子之處已也忠其過人也恕使其由
此悔悟更以善意從我固所願也雖其不能如
此我固不為已甚豈若小丈夫然哉一與人絕
則醜詆固拒唯恐其復合也

序蘇公刺暴公也暴公為卿士而譖蘇公焉故

蘇公作是詩以絕之

鄭氏曰暴蘇皆畿內國名

孔氏曰左傳云蘇忿生以溫為司寇

則蘇國在溫春秋時蘇稱子此云公者蓋子爵而為三公者

世本云暴辛

公作塤蘇成公作虢譙周古史考古有塤

虢尚矣周幽王時二公特善其事耳今按書

有司寇蘇公春秋傳有蘇忿生戰國及漢時

有人姓暴則固應有此二人矣但此詩中只

有暴字而無公字及蘇公字不知序何所據

而得此事也世本說尤紕繆譙周又從而傳

會之不知適所以章其謬耳

孝迂仲曰世本古史考見此詩

言伯氏吹墳仲氏吹簫遂為此說皆求詩之過也

萋

七西反

兮斐

孚匪反

兮成是貝錦彼譖人者亦已大

音甚

食荏反

比也萋斐小文之貌貝水中介蟲也有文彩似錦

孔氏

曰錦而連貝故知為貝之文其文彩之異小大之殊甚衆古者貨貝是也埤雅曰錦文如貝謂之貝錦貝中肉如科斗而有首尾以其背用故謂之貝貝背也

時有遭讒而被宮刑為

巷伯者作此詩

鄭氏曰宮者割其勢若今宦者也

言因萋斐之形而

文致之以成貝錦以比譖人者因人之小過而飾成

大罪也彼為是者亦已大甚矣

哆

昌者反

兮侈

尺是反

兮成是南箕彼譖人者誰適

丁歷反下

同

與謀

叶模悲反

比也哆侈微張之貌南箕四星二為踵二為舌

愚按即箕

星也以其常見於南方故謂南箕

其踵狹而舌廣則大張矣適主也

誰適與謀言其謀之閔也

緝緝

七立反

翩翩

音篇叶批賓反

謀欲譖人慎爾言也謂爾不

信

叶斯人反

賦也緝緝口舌聲或曰緝緝人之罪也或曰有條理

貌皆通翩翩往來貌

嚴氏曰譖人情狀接續增多緝然如女之續往來輕飄翩翩

然如鳥之飛相與經營謀為譖譖而已

譖人者自以為得意矣然不慎

爾言聽者有時而悟且將以爾為不信矣

捷捷幡幡

芳煩反叶芬連反

謀欲譖言豈不爾受既其女

音汝

遷

賦也捷捷儼

血平聲

利貌幡幡反覆貌王氏曰上好諧

則固將受女然好諧不已則遇諧之禍亦既遷而及

女矣

輔氏曰汝能諧人人亦能諧汝其禍將遷及汝矣

曾氏曰上章及此皆

忠告之詞

輔氏曰慎爾言也謂爾不信自諧者而言也豈不爾受既其女遷自聽者而言也皆

所必至之理故以之忠告於為諧者庶乎其知所畏而不敢肆耳

驕人好好勞人草草蒼天蒼天

叶鉞因反

視彼驕人矜此

勞人

賦也好好樂也草草憂也驕人諧行而得意勞人遇

譖而失度其狀如此

胡庭芳曰王氏云蒼天蒼天蓋以王之不明無所告愬而告之

于天也輔氏曰視彼騷人庶乎有以扶持慰安之也止之也矜此勞人庶乎有以扶持慰安之也

彼譖人者

叶掌與反

誰適與謀

叶滿補反

取彼譖人投畀豺

叶士皆

反

虎豺虎不食投畀有北有北不受

叶承况反

投畀有昊

叶計

反候

賦也再言彼譖人者誰適與謀者甚嫉之故重言之

也或曰衍

去聲

文也投棄也

說文曰豺狼屬狗聲

北北方寒涼不

毛之地也

愚按窮北之地多寒不生草木五穀投棄讒人於彼使凍餓之也

不食不

受言讒譖之人物所共惡也昊天也投畀昊天使制其罪此皆設言以見欲其死亡之甚故曰好賢

如緇衣惡惡如巷伯

埤雅曰豺虎以殺為性則宜無所不食有北以載為德則宜無

不受者今曰不食不受且付昊天使制其罪則惡之甚也呂東萊曰記緇衣云好賢如緇衣惡惡如巷伯則爵不瀆而民愿刑不試而民咸服真氏曰讒人為害至深故詩人疾之亦甚舜之治四凶也以禦魑魅而大學于不仁之人欲屏諸四夷詩人之情亦若是也

揚園之道猗

於綺反

于畝丘

叶社奇反

寺人孟子作為此詩

凡百君子敬而聽之

興也揚園下地也猗加也畝丘高地也寺人內小臣

蓋以讒被宮而為此官也

愚按周禮天官寺人之官凡五人寺之言侍也侍王

於路寢而掌王之內人及女宮之戒令蓋奄人也

孟子其字也

楊園之道

而猗于畝丘以興賤者之言或有補於君子也蓋諧

始于微者而其漸將及于大臣也故作詩使聽而謹

之也劉氏曰其後王后太子及大夫果多以讒廢者

輔氏曰諧始于微者進而嘗之也君若受之則諧者之氣益壯而心益大末流之禍豈止及其大臣而已哉雖王后太子或有所不免故堅讒必折其芽辨于微小可也然非明且遠者不能焉董氏曰幽王之世

大臣傷于讒者如蘇公小臣傷于讒如寺人孟子則上下其得以免乎愚按劉氏此言蓋從小序以此為幽王時詩也集傳既引其說而未嘗明言其為幽王詩讀者當自得之

巷伯七章四章章四句一章五句一章八句一章

六句

陳壽翁曰巧言何人斯巷伯三篇其述讒言之禍與讒人之情狀可謂極矣

巷是宮內道名秦漢所謂永巷是也

愚按三輔黃圖云永

長也宮中之長巷幽閉宮女之有罪者武帝伯時改為振廷周宣王姜后嘗待罪永巷是也

長也王宮內道官之長即寺人也故以名篇

曹氏

曰巷者內人之所居伯者長也其官為寺人而職中丞故稱巷伯焉

班固司馬

遷贊云述其所以自傷悼小雅巷伯之倫其意亦謂巷伯本以被譖而遭刑也而楊氏曰寺人內侍之微者出入于王之左右親近于王而日見之宜無間之可伺矣今也亦傷於讒則疎遠者可知故其詩曰凡百君子敬而聽之使在位知戒也其說不同然亦有理姑存于此云

序刺幽王也寺人傷于讒故作是詩也

習習谷風維風及雨將恐

丘勇反

將懼維予與女音汝將安

將樂

音洛

女轉棄予

叶演女反

興也習習和調貌谷風東風也將且也恐懼謂危難

憂患之時也此朋友相怨之詩故言習習谷風則

維風及雨矣將恐將懼則維予與女奈何將安將樂

而女轉棄予哉

習習谷風維風及頽

徒雷反

將恐將懼寘

之致反

予于懷

叶胡反

將安將樂棄予如遺

叶夷反

興也頽風之焚輪者也

孔氏曰迴風從上下曰頽

實與置同置于

懷親之也如遺忘去而不復存省也

謝疊山曰真子于懷是進人若

將加諸膝棄予如遺是退人若將墜諸淵

習習谷風維山崔

徂四反

嵬

五四反

無草不死無木不萎

叶於回反

忘我大德思我小怨

叶韻未詳

比也崔嵬山巔也

習習谷風維山崔嵬則風之所

被者廣然猶無不死之草無不萎之木況於朋友豈

可以忘大德而思小怨乎或曰興也

輔氏曰大德謂朋友之義出于

天者小怨謂難語忿色生于人者忘大德思小怨必是當時人有如此實事故末章因風以為比而明言

之以戒其不可如是也或以為興者
拘于側耳然不若以為比之是也

谷風三章章六句

呂與叔曰急則相求緩則相棄恩厚不知怨小必記皆小人之交也

序刺幽王也天下俗薄朋友道絕焉

蓼蓼

六音

者莪

五河反

匪莪伊蒿

呼毛反

哀哀父母生我劬勞

比也蓼長

上聲

大貌莪美菜也蒿賤草也

嚴氏曰莪蘿蒿也蒿草中

之高者也管子云嘉穀不生而蓬蒿蒺藜秀

人民勞苦孝子不得終養

而作此詩言昔謂之莪而今非莪也特蒿而已以比

父母生我以為美材可賴以終其身而今乃不得其

養以死于是乃言父母生我之劬勞而重自哀傷也

蓼蓼者莪匪莪伊蔚

音尉

哀哀父母生我勞瘁

似醉反

比也蔚牡蒿

僅

也三月始生七月始華如胡麻華而

紫赤八月為角似小豆角銳而長

嚴氏曰一名馬薪蒿蒿之尤龐大者

也瘁病也

餅之馨矣維疊之恥鮮

息淺反

民之生不如死之久

叶

里反

矣無父何怙無母何恃出則銜恤入則靡至

比也餅小疊大皆酒器也馨盡鮮寡恤憂靡無也

言餅資于墨而墨資餅猶父母與子相依為命也故

餅罄矣乃墨之恥猶父母不得其所乃子之責

愚按以餅

比父母以墨比子但取其相資之義而不取義于餅墨之小大也如左傳昭公二十四年鄭子大叔引此而曰王室之不寧晉之恥也以餅喻所以窮獨之民周以墨喻晉亦不取小大之義也

生不如死也蓋無父則無所怙無母則無所恃是以

出則中心銜恤入則如無所至也

輔氏曰玩此四句真能道孝子之情

非身復而親歷之不知其味也

父兮生我母兮鞠我拊

音撫

我畜

許六反

我長

丁丈反

我育

我顧我復我出入腹我欲報之德昊天罔極

賦也生者本其氣也鞠畜皆養也拊拊循也

劉執中曰防其

驚也則拊之

育覆育也

孔氏曰謂其寒暑或身體之覆近而愛育之

顧旋視也

孔氏曰謂去之而反顧也

復反覆也

丘氏曰不能暫捨也

腹懷抱也

孔氏曰謂置之

於懷抱

罔無極窮也

言父母之恩如此

謝疊山曰此章形容父母

愛子之心盡之矣生我如天之生物也鞠我如地之養物也拊者撫摩其身體察其肥瘠憂其疥癬也畜

者謹其出入察其起居藏之堂與之中不敢縱之門庭之外惟恐其病疾也長者如南風之長養萬物調

和其身體滋養其血氣日夜望其長大育者如易曰育德孟子曰教育英才涵養其德性發舒其志氣開

導其聰明日夜望其成人也顧者父母行而兒不隨則回顧之也復者兒行而父母不隨則追喚之也腹者懷抱於腹間也父母有所往將出門懷抱其子而未忍捨父母自外歸既入門懷抱其子而未肯置人能深思九字之義必不忘父母之恩矣 欲報之以德而其恩之大如天

無窮不知所以為報也

輔氏曰此章則賦父母之恩未乃歎其如天之無窮無物

可以為報之意故嘗為之說曰臣之於君其忠有盡子之于親其孝無窮

南山烈烈飄風發發民莫不穀我獨何害

叶音

興也烈烈高大貌發發疾貌穀善也 南山烈烈則

飄風發發矣民莫不穀而我獨何為遭此害也哉嚴氏

曰孝子念親之沒瞻南山之烈烈感飄風之發發觸目
皆悲傷也故嘆民莫不得以養其父母我獨何為遭
此害而不
得終養乎

南山律律飄風弗弗

叶分
反

民莫不穀我獨不卒

興也律律猶烈烈也弗弗猶發發也卒終也言終養

也

輔氏曰我獨何為而遭此害也哉我獨何為而不得
終養也哉此兩句最宜玩茲末後占及其所以不

得終養
之意

蓼莪六章四章章四句二章章八句

晉王裒以父死非罪

愚按司馬昭為魏安東將
軍與吳戰敗昭問於衆曰

近日之事誰任其咎王褒父保每讀詩至哀哀對曰責在元帥昭怒而斬之

父母生我劬勞未嘗不三復流涕受業者為廢

此篇詩之感人如此

輔氏曰先生載王褒一事以見詩之感人如此必如

是然後為善讀詩也以至解頤手舞足蹈皆實有是理但患人不善讀耳陳少南曰此詩孝子行役而喪其親者之所作其詞深而切孝迂仲曰凱風母不安其室之詩也小弁太子見棄之詩也蓼莪孝子不得終養之詩也故其咎責怨慕哀痛如此苟不為母所棄不為父所逐不困于行役而得終養則其歡欣可知矣觀詩者當以此類求之

序刺幽王也民人勞苦孝子不得終養爾

有饒

音蒙 簋

飧

音孫

有掾

音求 棘

已

必履反

周道如砥

之履反

其

直如矢君子所履小人所視

叶善止反

瞻

音卷

言顧之潛

所姦反

焉出涕

音體

興也饒滿簋貌飧熟食也

孔氏曰禮簋盛黍稷

掾曲貌棘已以

棘為已所以載鼎肉而升之於俎也

儀禮特牲注曰已用棘心孔氏

曰雜記云已用桑長三尺古禮則用棘

砥礪石言平也矢言直也君子

在位履行小人下民也睠反顧也潛涕下貌序以

為束國困于役而傷于財譚大夫作此以告病

孔氏曰譚

國在京
師之東
言有饒簋殽則有棗棘也周道如砥則其直

如矢是以君子履之而小人視焉今乃顧之而出涕

者則以東方之賦役莫不由是而西輸於周也輔氏曰周道只

道路之道與下章周行一意故集解以為東方之賦役莫不由是而西輸于周是即指道路而言也然以

上四句平直履視之義觀之則又似指周之王道而言豈本意只是指道路而言而其中亦含此意耶

小東大東叶都郎反杼直呂反柚音逐其空叶枯郎反糾糾葛屨可

以履霜佻佻徒彫反公子行彼周行叶戶郎反既往既來叶直力反

使我心疚叶訖力反

賦也小東大東東方小大之國也自周視之則諸侯

之國皆在東方杼持緯者也

曹氏曰梭也

柚受經者也空

盡也佻輕薄不奈勞苦之貌公子諸侯之貴臣也周
行大路也疚病也言東方小大之國杼柚皆已空

矣至于以葛屨履霜而其貴戚之臣奔走往來不勝

其勞使我心憂而病也

輔氏曰糾糾葛屨可以履霜舉其甚者言之也以葛屨履

霜則冬裘之不備可知矣既往既來則言其來往之不一也周道一也方其盛時君子履之而小人視焉及其衰也公子行之而人心病焉時移事變而人心所感不同如此

有洌

音列

洌

音軌

泉

叶才

反

無浸

穫

薪

契

契

苦反

計

寤歎

哀我

憚

丁佐反

人薪

是穫

薪尚

可載

叶節

反

也哀我

憚人

亦可

息

也

興也洌寒意也側出曰洌泉穫艾也契契憂苦也憚

勞也尚庶幾也載載以歸也蘇氏曰薪已穫矣而

復漬之則腐民已勞矣而復事之則病故已艾則庶

其載而畜之已勞則庶其息而安之

輔氏曰上兩章既言傷於財故

此章推本其困于役而言之耳

東人之子職勞不來

音貴叶六直反

西人之子粲粲衣服

叶蒲

北反

舟人之子熊羆是裘

叶梁之反

私人之子百僚是試

叶申之反

賦也東人諸侯之人也職專主也來慰撫也西人京

師人也粲粲鮮盛貌舟人舟楫之人也熊羆是裘言

富也私人私家皂隸之屬也僚官試用也舟人私人

皆西人也此言賦役不均羣小得志也

李迂仲曰此章言東

人之勞西人之逸小人得志綱紀敗壞無復王室之舊也

或以其酒不以其漿韜韜

胡犬反

佩璲

音遂

不以其長維

天有漢監

古雙反

亦有光跂

丘跂反

彼織女終日七襄

賦也鞞鞞長貌璣瑞也

鄭氏曰佩璣者以瑞玉為佩

漢天河也

孔氏

曰漢水之精也氣發而升精華浮上宛轉隨流名曰天河一曰雲漢

跂隅貌織女星

名在漢旁三星跂然如隅也七襄未詳傳曰反也箋

云駕也駕謂更其肆也蓋天有十二次日月所止舍

所謂肆也經星一晝一夜左旋一周而有餘則終日

之間自卯至酉當更七次也

孔氏曰在天為次在地為辰星之行晝夜雖各

六辰數者舉其終始故七即自卯至酉也愚按日月五星為緯其餘皆為經星經星周布與天為體所謂

經星一晝夜左旋一周天而有餘者即夫之旋一周而
又過一度者也然周天十二次一晝夜十二時則
一時當歷一次故終其晝日之間自
卯至酉凡七時織女星當歷七次也
言東人或饋

之以酒而西人曾不以為漿東人或與之以韜然之

佩而西人曾不以為長維天之有漢則庶乎其有以

監我

歐陽子曰言我民困矣天之雲漢有光亦能下降我民乎其不言日月之明而言雲漢之光者

謂不能下監也

而織女之七襄則庶乎其能成文章以報我

矣無所赴愬而言惟天庶乎其恤我耳

輔氏曰侯邦供王賦役固

其職也然為王者當有以體恤之不敢易視而輕用
之可也觀禹貢之底慎財賦無逸之惟正之供則必

不至于易視而輕用之矣今也東國財力俱困而饋西人以酒則視之曾不如漿與之以韜然之佩則視之曾不以為長易視之如此則輕用之必矣此東國之所以怨病而愬之于天也

雖則七襄不成報章曉華板反彼牽牛不以服箱東有

啟明

叶謨郎反

西有長庚

叶古郎反

有捄天畢載施之行

戶郎反

賦也曉明星貌牽牛星名

爾雅曰何鼓謂之牽牛何胡可反

服駕也

箱車箱也

孔氏曰兩較之間謂之箱是車內容物之處較音角

啟明長庚皆金

星也以其先日而出故謂之啟明以其後日而入故

謂之長庚

劉執中曰金星朝在東所以啟日之明夕在西所以續日之長詩攷曰韓詩云晨出東

方為啟明昏見西方為長庚毛氏曰庚續也

蓋金水二星常附日行而或

先或後但金大水小故獨以金星為言也

愚按金水附日而行

無定在或一在日先一在日後或俱在日先或俱在日後金星行在日後則晨見而昏不見行在日先則昏見而晨又不見也天畢畢星也狀如掩兔之畢行行列也

言彼織女不能成報我之章牽牛不可以服我之箱

而啟明長庚天畢者亦無實用但施之行列而已

鄭氏

曰織女有織名耳駕則有西無東不如人織相反報成文章牽牛不可用於服箱啟明長庚皆有助日之名而無實光也歐陽子曰雖有織女不能為我織而成章雖有牽牛不能為我駕車而輸物雖有啟明長

庚不能助日為晝俾我營作雖有天畢不能為我掩捕鳥獸

至是則知天亦無若

我何矣

維南有箕不可以簸

波我反

揚維北有斗不可以挹

音揖

酒漿維南有箕載翕

許急反

其舌維北有斗西柄之揭

音計

賦也箕斗二星以夏秋之間見於南方

愚按六七月間見於南方

者指當時昏見為言也

云北斗者以其在箕之北也

愚按此謂南斗即上

文夏秋之間見南方者也

或曰北斗常見不隱者也翕引也舌下

二星也南斗柄固指西若北斗而西柄則亦秋時也

董氏曰箕其踵似箕且有舌斗其方如斗且有柄箕四星二為踵三為舌踵狹而舌廣故曰俞斗四星為斗三星為柄

言南箕既不可以簸揚糠粃北斗既不可

以挹酌酒漿

李迂仲曰古人多以箕斗為虛名蓋此數星皆人間器用之物有名而無實故

以為喻

而箕引其舌反若有所吞噬斗西揭其柄反若

有所挹取于東是天非徒無若我何乃亦若助西人

而見困甚怨之詞也

歐陽子曰自維天者漢以下皆述譚人仰訴于天之詞其意言

我譚人困于供億取資于地者皆已竭矣欲取于天又不可得也未言箕斗非徒不可用箕反若有所噬斗反若有所挹取于東是皆怨諷之詞也輔氏曰二章三章以下文意奇逸其辭雖若閑疎而意脈實相

連屬作此詩者非唯怨得其正其亦老于文墨者歟

大東七章章八句

序刺亂也東國困於役而傷於財譚大夫作是詩以告病焉

譚大夫未有考不知何據恐或有傳耳

四月維夏

叶後五反

六月徂暑先祖匪人胡寧忍予

叶演女反

興也徂往也四月六月亦以夏正數之建巳建未之月也此亦遭亂自傷之詩言四月維夏則六月徂

暑矣我先祖豈非人乎何忍使我遭此禍也無所歸咎之詞也

秋日淒淒

七西反

百卉

許貴反

具腓

芳菲反

亂離瘼

音莫

矣爰

家語作奚

其適歸

興也淒淒涼風也卉草腓病離憂瘼病奚何適之也

秋日淒淒則百卉具腓矣亂離瘼矣則我將何所

適歸乎哉

呂東萊曰秋日冬日猶云秋時冬時也李迂仲曰感興言下民困病如秋日淒淒然

而百草俱病也

冬日烈烈飄風發發民莫不穀我獨何害

叶音曷

興也烈烈猶栗烈也發發疾貌穀善也

李迂仲曰天下莫不被禍

乃云民莫不善者此據作詩者之言也

夏則暑秋則病冬則烈言禍

亂日進無時而息也

輔氏曰此章亦興也而先生但連上二章為說云夏則暑秋則

病冬則烈言禍亂日進無時而息如此說則却似賦體其不解所以為興者蓋此章之說已見于蓼莪篇

矣彭氏曰天地之運隨時變遷四時之景本無美惡惟夫歡樂者遇之則為美景憂愁者觸之則為惡况

今四月之大夫夏則苦徂暑之薰灼秋則悲百卉之彫瘵冬則傷飄颻之迅急是皆遇景生悲觸緒增感

其心無一時得以自寬焉吟咏其詞可見當時之亂矣范氏曰言夏秋冬獨不及春蓋天氣和暢萬物發

育治之象也自古治世少
亂世多觀四時可知矣

山有嘉卉侯栗侯梅

叶莫反

廢為殘賊莫知其尤

叶于其反

興也嘉善侯維廢變尤過也

山有嘉卉則維栗與

梅矣

錢氏曰卉草也通言之則草木皆卉也

在位者變為殘賊則誰之

過哉

相

息亮反

彼泉水載清載濁

叶殊玉反

我日構禍曷云能穀

興也相視載則構合也

相彼泉水猶有時而清有

時而濁而我乃日日遭害則曷云能善乎

滔滔

吐刀反

江漢南國之紀盡瘁以仕寧莫我有

叶羽已反

興也滔滔大水貌江漢二水名紀綱紀也謂經帶包

絡之也瘁病也有識有也滔滔江漢猶為南國之

紀今也盡瘁以仕而王何其不我有哉

匪鷄

徒九反

匪鳶

以專反叶以句反

翰飛戾天

叶鐵因反

匪鱣

張連反

匪鰭

于軌反

潛逃于淵

叶一均反

賦也

輔氏曰此章本亦興體但有所託之物而無所興之辭故不可謂之興又有四箇匪字故亦

不可謂之比而只得以為賦也

鷄鵬也鳶亦鷲鳥也其飛上薄雲漢

鱣鮪大魚也

鷦鷯則能翰飛戾天鱣鮪則能潛逃

于淵我非是四者則亦無所逃矣

陳少南曰言雖欲高飛深藏而不可

也得也

山有薜薇隰有杞桋

音夷

君子作歌維以告哀

叶於希反

興也杞枸

苟櫪計也

本草曰枸杞一名地骨春夏採

葉秋採莖實冬採根皆可食

桋赤桋

色也

樹葉細而歧銳皮理錯戾好叢生山中

中為車輶

山則有薜薇隰則有杞桋君子作歌則

維以告哀而已

輔氏曰維以告哀而已無他事也則其情切矣

四月八章章四句

序大夫刺幽王也在位貪殘下國構禍怨亂並

興焉

小旻之什六十五章四百十四句

詩傳通釋卷十二

欽定四庫全書

詩傳通釋卷十三

元 劉瑾 撰

詩

朱子集傳

北山之什二之六

陟彼北山言采其杞偕偕士子

叶獎里反

朝夕從事

叶上止反

王

事靡盬憂我父母

叶蒲彼反

賦也偕偕強壯貌士子詩人自謂也 大夫行役而

作此詩自言陟北山而采杞以食者皆強壯之人而

朝夕從事者也蓋以王事不可以不勤是以貽我父

母之憂耳

鄭氏曰王事無不堅固故我當盡力勤勞於役久不得歸父母思已而憂思按此章

可見詩人忠孝之心也

溥

音普

天之下

叶後反

莫非王土率土之濱莫非王臣大

夫不均我從事獨賢

叶下反

賦也溥大率循濱涯也

言土之廣臣之衆而王不

均平使我從事獨勞也

饒氏曰無才者多逸有才者多勞以其能任事故也言凡

為王臣者皆當任王事何獨使我為賢而勞之乎謝疊山曰自古君子常任其勞小人常處其逸君子常任其憂小人常享其樂雖曰役使不均不斥王而曰我獨賢勞然君子本心亦不願逸樂也

大夫不言獨勞而曰獨賢詩人之忠厚如此

四牡彭彭

叶鋪郎反

王事傍傍

布彭反叶布光反

嘉我未老鮮

息淺

反

我方將旅力方剛經營四方

賦也彭彭然不得息也傍傍然不得已也嘉善鮮少

以為少而難得也將壯也旅與輶同言王之所以

使我者善我之未老而方壯膂力可以經營四方耳

猶上章之言獨賢也

謝疊山曰此詩本為役使不均獨勞於王事而作此章乃曰天

子嘉我之未老善我之方壯喜我之旅力方剛而可以經營四方故獨見任使反以王為知己忠厚之至也愚按此章言所以從事獨賢之意

或燕燕居息或盡瘁事國

叶越逼反

或息偃在床或不已

于行

叶戶郎反

賦也燕燕安息貌瘁病已止也

言役使之不均也

下章放此

輔氏曰此章而下則方言其不均之實然亦不過以其勞逸者對言之使上之人自

察耳但言之重辭之複則其望於上者亦切矣詩可以怨謂此類也愚按以下三章凡十二句為偶皆以他人之逸樂對己之憂勞所以形容不均之意

或不知叫號

戶力反

或慘慘

七感反

劬勞或栖

西音

遲偃仰

或王事鞅

於兩反

掌

賦也不知叫號深居安逸不聞人聲也鞅掌失容也

言事凡勞不暇為儀容也

輔氏曰燕安也重言之見安之甚也或燕燕而自居

於休息或盡瘁而力為國事或息偃在牀以自逸或不已於行以自苦或深居而不接人聲或憂慘而自極劬勞或栖遲于家而偃仰自適或煩勞於國而儀容不整或耽樂飲酒以自樂或慘慘畏咎以自憂或

出入風議而親近從容或靡事不為而疎遠勞勩

或湛

都南反

樂飲酒或慘慘畏咎

巨九反

或出入風

音議

叶魚

反

或靡事不為

賦也咎猶罪過也出入風議言親信而從容也

北山六章三章章六句三章章四句

李迂仲曰孔子云公則說

若不均則雖征役未甚勞苦而人亦怨矣觀大東之詩則有粲粲衣服者有葛屨履霜者北山之詩則有患僮在床者有不已于行者則天下安得而說服哉胡庭芳曰補傳云大東言賦之不均北山言役之不均

序大夫刺幽王也役使不均已勞於從事而不

得養其父母焉

無將大車祇

音支

自塵兮無思百憂祇自疢

劉氏曰當作痕與瘡同眉

反貧
兮

興也將扶進也大車平地任載之車駕牛者也祇適
疢病也此亦行役勞苦而憂思者之作言將大車

則塵汙之思百憂則病及之矣

輔氏曰夫行役者進而有王事之期程唯

恐其有不期之悔退而有家事之多端唯恐其有意
外之虞所可憂者因不一而足也故曰百憂戒之以

无思者言姑置之勿以為念可也
不然適所以自病而已矣

無將大車維塵冥冥

叶莫
迴反

無思百憂不出于頰

古迴
反

興也冥冥昏晦也頰與耿同小明也在憂中耿耿然
不能出也

無將大車維塵雖

於勇於
容二反

今無思百憂祇自重

直勇
直龍

二
反兮

興也雖猶蔽也重猶累也

無將大車三章章四句

序大夫悔將小人也

此序之誤由不識興體而誤以為比也

明明上天照臨下土我征徂西至于允

音求野

叶上與反

二月

初吉載離寒暑心之憂矣其毒大

音泰

苦念彼共

音章

恭下同

人涕零如雨豈不懷歸畏此罪罟

音古

賦也征行徂往也允野地名蓋荒遠之地也二月亦

以夏正數之建卯月也初吉朔日也毒言心中如有

藥毒也共人僚友之處者也懷思罟網也大夫以

二月西征至于歲暮而未得歸故呼天而訴之

輔氏曰明

明上天照臨下土宜無不察也故呼而訴之

復念其僚友之處者且自言

其畏罪而不敢歸也

謝疊山曰僚友雖以恭敬自持然上無明君下無賢相無愛惜

善類不知果能免禍否所以念之深至於涕零也輔氏曰言其涉行之遠歷時之久故其心之憂如中藥之毒而甚苦也共人即靖共爾位之寮友也寮友不一而足有出者有處者宜也已之征役固勞苦矣然以其所謂罪罟譴怒威急反覆觀之則寮友之處者亦豈有樂事哉此所以思之而涕零如雨又自言我亦豈不懷歸而相與共事哉正以畏不測之罪而不敢歸爾罪罟言其以罪而加人如罔罟之取物而物有不及知者也不言思其室家而欲歸乃言思其寮友者善為辭也然室家之思固亦在其中矣

昔我往矣日月方除

直慮反

曷云其還歲聿云莫

音慕念

我獨兮我事孔庶心之憂矣憚

丁佐反

我不暇

叶胡故反

念彼

其人睠睠

音眷

懷顧豈不懷歸畏此譴怒

賦也除除舊生新也謂二月初吉也庶衆憚勞也睠

睠勤厚之意譴怒罪責也言昔以是時往今未知

何時可還而歲已莫矣蓋身獨而事衆是以勤勞而

不暇也

輔氏曰睠睠懷顧言已之於寮友勤厚睠睠然懷思而顧念之也譴怒則明言其罪責之及耳

昔我往矣日月方奧

於六反

曷云其還政事愈感

子六反

歲聿云莫采蕭穫菽心之憂矣自詒伊戚

叶子六反

念彼共

人興言出宿豈不懷歸畏此反覆

芳福反

賦也奧暖

孔氏曰即春溫亦謂二月也

感急詔遺戚憂興起也反

覆傾側無常之意也

言以政事愈急是以此歲

暮而猶不得歸

輔氏曰采蕭穫菽則歲莫之事也

又自咎其不能見

幾遠去而自遺此憂至於不能安寢而出宿於外也

鄭氏曰夜卧起宿於外憂不能宿於內也謝疊山曰興言出宿又不止於惓惓懷顧矣

嗟爾君子無恒安處靖共爾位正直是與神之聽之

式穀以女

汝音

賦也君子亦指其僚友也

謝疊山曰即所謂共人也

恒常也靖與

靜同

謝疊山曰靖如自靖自獻之靖凡事謀之心而安也共如溫共朝夕之共凡事共敬而不敢慢

也君子本共又勉之以靖共也

與猶助也穀祿也以猶與也

上章

既自傷悼此章又戒其僚友曰嗟爾君子無以安處

為常言當有勞時勿懷安也當靖共爾位惟正直之

人是助則神之聽之而以穀祿與女矣

嗟爾君子無恒安息靖共爾位好

呼報反

是正直神之

聽之介爾景福

叶筆力反

賦也息猶處也好是正直愛此正直之人也介景皆

大也

輔氏曰居亂朝事暗主與回邪之人共處易得隨風而靡惡直醜正故戒之以正直是與好是

正直則神明所祐而福祿至焉不必求之於人也

小明五章三章章十二句二章章六句

呂東萊曰前三章皆

悔仕亂世厭於勞役欲安處休息而不可得故每章有懷歸之歎然而知其不可歸矣故四章遠戒其同列卒章則又申言之胡庭芳曰此詩豈西征之大夫寄其僚友之處者乎歐陽子曰大雅明明在上謂之大明小雅明明上天謂之小明自是名篇者偶為誌別爾了不闕詩義也陳壽翁曰此詩

因已之久役於外而思僚友之安處於內者且於已
無賢勞之恨而謂憂感之自詒於彼無憎疾之辭
而勉以為正直之是助哀而不傷怨而不怒視北
山之詩稍庶幾焉豈賦北山者有父母故其辭極
哀怨賦小明者已無父
母故其辭頗和平也歟

序大夫悔仕於亂世也

鼓鐘將將

上羊反

淮水湯湯

音傷

憂心且傷淑人君子懷允

不忘

賦也將將聲也淮水出信陽軍桐栢山至楚州漣水

軍入海

恩按

信陽軍即今汴梁路信陽州漣水軍湯
即今淮西道安東州漣水縣並隸河南省

湯沸騰之貌淑善懷思允信也 此詩之義未詳王

氏曰幽王鼓鐘淮水之上為流連之樂久而忘反聞

者憂傷

李迂仲曰聲之所感皆因人之哀樂將亡之政其民困故聞其聲以悲以見樂與政通而

不專係於音也

而思古之君子不能忘也

輔氏曰懷允不忘言其傷今思古而

信不能忘也

鼓鐘喈喈

音皆叶居奚反

淮水潛潛

戶皆反叶賢雖反

憂心且悲淑

人君子其德不回

叶乎為反

賦也喈喈猶將將潛潛猶湯湯悲猶傷也回邪也

輔氏

曰悲甚於傷樂所以象德其德不
回則言古之君子樂與德稱也

鼓鐘伐鼗

古毛反叶
居尤反

淮有三洲憂心且妯敕留淑人

君子其德不猶

賦也鼗大鼓也周禮作臯云臯鼓尋有四尺

愚按集傳所引

周禮考工記鞀人文也然地官鼓人又云以鼗鼓鼓
役事則字亦作鼗矣注云長丈二尺即尋有四尺也

三洲淮上地

呂東萊曰三洲作詩
者賦當時所見也

蘇氏曰始言湯湯

水盛也中言潛潛水流也終言三洲水落而洲見也言

幽王之久於淮上也妯動猶若也言不若今王之荒

亂也

輔氏曰伐磬舉樂器之大者言之以見其樂之盛也妯甚於悲謂常動而不息也其德不猶言

與今之君子不相似也將將唱唱伐磬言其樂之盛也湯湯諧諧三洲言其時之久也且傷且悲且妯言其憂之甚也樂之盛作之久也而民心之憂益甚則與古之王者憂民之憂樂民之樂者異矣

鼓鍾欽欽鼓瑟鼓琴笙磬同音以雅以南

叶尼反

以籥

以灼反

不僭

子念反叶七心反

賦也欽欽亦聲也磬樂器以石為之琴瑟在堂笙磬

在下同音言其和也雅二雅也南二南也籥籥舞也

僭亂也言三者皆不僭也蘇氏曰言幽王之不德

豈其樂非古歟樂則是而人則非也

濮氏曰但時非古之時聞其樂

祇見其可傷也孟子告齊宣王者可以觀矣

鼓鐘四章章五句

此詩之義有不可知者今姑釋其訓詁名物而

略以王氏蘇氏之說解之未敢信其必然也

胡庭

芳曰歐公云鼓鐘序但言刺幽王不知刺何事據詩文則是作樂於淮上矣然旁考詩書史記皆無幽王東巡之事書曰徐夷並興蓋自成王時徐夷及淮夷已皆不為周臣宣王時嘗遣將征之亦不自往初無幽王東至淮徐之事然則不得作樂於淮上矣當闕其所未詳嚴氏謂古

事亦有不見於史而因經以見者詩即史也其
論固當然而詩文亦不明言其為幽王也故集
傳以為未詳又曰未
敢信其必然得之矣

序刺幽王也

此詩文不明故序不敢質其事但隨例為刺
幽王耳實皆未可知也

楚楚者茨言抽

敕留反

其棘自昔何為我蓺

魚世反

黍稷我

黍與與

音餘

我稷翼翼我倉既盈我庾維億以為酒食以

享以祀

叶逸反

以妥

湯果反

以侑

音又叶夷益反

以介景福

叶筆力反

賦也楚楚盛容貌茨蒺藜也抽除也我為有田祿而

奉祭祀者之自稱也與與翼翼皆蕃盛貌露積

如字又音

漬

曰庾

孔氏曰甫田言曾孫之庾如坻如京是積粟也故曰露積周語云野有庾積

十萬

曰億享獻也安安坐也禮曰詔安尸

郊特牲注曰尸始入祝則詔主

人拜安尸使之坐

蓋祭祀筮族人之子為尸

李寶之曰曲禮云為人子者祭

祀不為尸則尸筮無父者皆用孫之倫有爵者為之既奠迎之使處神坐而拜

以安之也

少牢禮曰祝設几于筵上祝酌奠主人西面再拜祝出迎尸于廟門外尸入升筵祝

主人皆拜安尸尸不言答拜遂坐李寶之曰祭統云君迎牲而不迎尸別嫌也尸在廟門外則疑於臣在

廟則全於君

侑勸也恐尸或未飽祝侑之曰皇尸未實也

少牢曰尸告飽祝獨侑曰皇尸未實侑尸又食主人不言拜侑尸又三飯

介大也景亦大

也此詩述公卿有田祿者力於農事以奉其宗廟

之祭

吳伯豐問自后稷以農事肇祀其詩未嘗不瞻瞻於此孟子亦曰禮曰諸侯耕助以供粢盛粢

盛不潔不敢以祭古之人未有不先成民而後致力於神者恐不必專指公卿言之先生答曰此諸篇在小雅而非天子之詩故止得以公卿言之蓋皆畿內諸侯矣故言蒺藜之地有抽除

其棘者古人何乃為此事乎蓋將使我於此執黍稷

也

輔氏曰首四句推本而言以見其不忘所自也王氏以為我倉既盈則無所藏之而露積為庾其數

至億者是也然此亦甚
言之以見有餘之意耳
故我之黍稷既盛倉庾既實

則為酒食以享祀妥侑而介大福也

濟濟

子禮反

蹌蹌

七羊反

絜爾牛羊以往烝嘗或剝或亨

普庚反叶
鋪郎反

或肆或將祀祭于枋

補彭反叶
補光反

祀事孔明

叶謨

郎反

先祖是皇神保是饗

叶虛良反

孝孫有慶

叶祛羊反

報以介福

萬壽無疆

賦也濟濟蹌蹌言有容也

輔氏曰古之祭祀用人甚多此言濟濟蹌蹌者謂凡

與祭之人皆有容儀也

冬祭曰烝秋祭曰嘗剝解剝其皮也亨

煮熟之也肆陳之也

蘇氏曰肆謂陳其骨休於俎也

將奉

持而進

持而進

之也

輔氏曰剥亨肆將各有其人皆蒙濟濟蹇蹇一句

祔廟門內也孝子不

知神之所在故使祝博求之於門內待賓客之處也

記郊特牲曰索祭祝于祔不知神之所在於彼乎於此乎注云索求神也愚按門內待賓之處恐即大門之內屏牆之外人君生時所宁立見賓之地在寢謂之宁在廟謂之祔恐其神或在此故使祝祭于其處也

孔甚也明猶備也著也

輔氏曰王氏云凡祀裸鬯則求諸陰燭蕭則求諸陽索祭

祝于祔則求諸陰陽之間蓋魂無不之神無不在求之之備如此祀事所以孔明也者是矣集傳又以爲明字兼備著
皇大也君也
輔氏曰君也者如府
保安
兩義者尤甚
君之謂所以尊之也

也神保蓋尸之嘉號楚辭所謂靈保亦以巫降神之

稱也

靈保神巫也神降而託於巫蓋身則巫而心則神也今詩中不說巫當便是尸也愚按祖考之

神降而安於尸之身故因以號尸也孝孫主祭之人也慶猶福也

執爨

七亂反

踏踏

七亦反叶

為俎孔碩

叶常反

或燔

音煩或

炙

之敕反叶

君婦莫莫

音麥叶

為豆孔庶

叶陟畧反

為賓為

客

叶克畧反

獻酬

市由反

交錯禮儀卒度

叶徒洛反

笑語卒獲

叶黃郭反

神保是格

叶剛反

報以介福萬壽攸酢

賦也爨竈也

毛氏曰爨爨爨爨也孔氏曰爨爨以煮肉爨爨以炊米少牢云爨爨在門東南

北土廟爨在
饗爨之北

踏踏敬也俎所以載牲體也碩大也燔

燒肉也炙炙肝也皆所以從獻也特牲主人獻尸賓

長以肝從主婦獻尸兄弟以燔從是也

燔者火燒之
名炙者遠火

之稱以難熟者近火易熟者遠之故肝炙而肉燔也
儀禮特牲饋食曰主人洗角酌醕尸賓長以肝從主
婦洗爵酌亞獻尸兄弟長以
燔從李寶之曰羞肝亦以俎君婦主婦也莫莫清靜

而敬至也

王介甫曰執爨賤者也賤者踏踏則貴者
可知也君婦尊者也尊者莫莫則卑者可

知也輔氏曰莫莫有冲漠之意唯清靜而敬之至者
方有此意思曰君婦者君即上也又所以尊稱之也

豆所以盛內羞庶羞主婦薦之也

鄭氏曰二羞所以
盡歡心內羞則醢

者其衆賓及衆兄弟交錯以卒盡也度法度也獲得徧皆如初儀交錯猶東西也

其宜也

李寶之曰笑語得宜者古者於旅也語

格來酢報也

輔氏曰禮儀卒度言

其禮儀盡合法度也笑語卒獲言其於旅而語之時其笑語無不得其宜也此神保之所以來格介福之所以來報萬壽之所以來酢也

我孔熯

而善反

矣式禮莫愆

叶起中反

工祝致告徂賚孝孫

叶須倫反

苾苾

蒲必反

芬孝祀

叶逸織反

神嗜飲食卜爾百福

叶筆力反

如

幾

音機

如式既齊既稷既匡既敕永錫爾極時萬時億

賦也熯竭也善其事曰工苾芬香也卜予也

予與同

幾

期也春秋傳曰易幾而哭是也式法齊整殺疾匡正

敕戒極至也 禮行既久筋力竭矣而式禮莫愆敬

之至也於是祝致神意以嘏

假

主人

輔氏曰祖賚孝孫鄭氏以為祖

往也賚予也所以重釋上句致告之義如言以其所致告者往而予孝孫也集傳失解此二字

曰爾

飲食芳潔故報爾以福祿使其來如幾其多如法爾

禮容莊敬故報爾以衆善之極使爾無一事而不得

乎此

輔氏曰禮容莊敬解既齊既稷既匡既救二句故報爾以衆善之極解永錫爾極一句使爾無

一事而不得乎此

各隨其事而報之以其類也

李實之曰

工祝致告以下皆
序嘏主人之詞
少牢嘏詞
主人佐食取黍授尸尸酢

執以命祝祝受以東
北面嘏主人曰云云
曰皇尸命工祝承致多福無疆

于女
音汝
孝孫
注曰承猶傳也
來
注曰讀曰釐賜也
女孝孫使

女受祿于天宜稼于田眉壽萬年勿替引之
注曰引長也言

無廢止時
長如是也
此大夫之禮也
愚按羊豕曰少牢少牢饋食諸侯之大夫祭禮也曲

禮又曰凡祭大夫以索牛者謂天子之大夫也
此詩為天子公卿之禮故有絜爾牛羊之文也

禮儀既備
叶蒲
鐘鼓既戒
叶訖
孝孫徂位
叶力
工祝

致告
叶古
神具醉止皇尸載起鼓鍾送尸神保聿歸諸

宰君婦廢徹

直列反

不遲諸父兄弟備言燕私

叶息夷反

賦也戒告也

輔氏曰禮儀既備言其禮之無不舉也鐘鼓既戒言其樂之無不奏也如此則

祭祀以畢矣

徂位祭事既畢主人往阼階上西面之位也

致告祝傳尸意告利成於主人言孝子之利養成畢

也

少牢曰主人出立于阼階上西面祝出西階東面告利成注曰利猶養也成畢也

於是神

醉而尸起送尸而神歸矣

孔氏曰尸與神為節度者也神無形故尸象焉少牢

曰告利成畢祝入主人降立于阼階東西面尸遂出于廟門外李寶之曰尸在廟門外則疑於臣故送迎

尸皆以廟門為斷

曰皇尸者尊稱之也鼓鍾者尸出入奏肆

夏也

周禮大司樂曰尸出入奏肆夏鍾注曰先擊鍾次擊鼓以奏時邁也

鬼神無形

言其醉而歸者誠敬之至如見之也諸宰家宰非一

人之稱也廢去也

鄭氏曰諸宰徹去諸饌君婦籩豆而已

不遲以疾為

敬

劉執中曰不敢緩如神猶在也

亦不留神惠之意也祭畢既歸

賓客之俎同姓則留與之燕以盡私恩所以尊賓客

親骨肉也

愚按儀禮主人之俎佐食徹之尸俎則佐食徹而有司歸之賓俎則有司徹而歸之

祝及兄弟眾賓之俎則皆自徹而出拜賓于門外而不敢留歸賓俎而不敢後所以尊賓也主人以阼俎

豆籩及尸祝兄弟之庶羞宴族人於堂主婦以祝豆籩及姑姊妹之俎宴內兄弟於房所以親親也

樂具入奏

叶音族

以綏後祿爾穀既將莫怨且慶

叶祛羊反

既醉既飽

叶補苟反

小大稽首神嗜飲食使君壽考

叶去九反孔

惠孔時維其盡

叶子忍反

之子子孫孫勿替

天帝反

引之

賦也凡廟之制前廟以奉神後寢以藏衣冠

愚按廟及寢皆

南向廟屋五架中架以南通謂之堂以北則分其東為房西為室此大夫之制也室有戶牖戶東而牖西牖之內為奧神位所在也房之東室之西近南各有箱爾雅所謂室有東西箱曰廟者是也廟之後別為寢以藏祖宗之遺衣冠祭時則授尸以服之其寢如廟之制而無東西箱爾雅所謂室無東西箱曰寢者是也祭於廟而燕於寢故於此將燕而祭時之樂皆入

奏於寢也

孔氏曰上章云備言燕私此章即言燕私之事又曰燕祭不得同樂而云皆入者歌

詠雖異樂器則同故皆入也

且於祭既受祿矣故以燕為將受後

祿而綏之也爾穀既進與燕之人無有怨者而皆歡

慶醉飽稽首

董氏曰稽首頭拜至地也

而言曰向者之祭神既嗜

君之飲食矣是以使君壽考也又言君之祭祀甚順

甚時無所不盡

董氏曰內盡禮外盡物

子子孫孫當不廢而引

長之也

楚茨六章章十二句

呂氏曰楚茨極言祭祀所以事神受福之節致
詳致備所以推明先王致力於民者盡則致力
於神者詳觀其威儀之盛物品之豐所以交神
明逮羣下至於受福無疆者非德盛政修何以

致之

輔氏曰一章言黍稷既成為酒食以祭祖
考二章言絜牛羊以為牲求陰陽以備著

三章言俎豆有碩多之實主婦有靜敬之德賓
客之賢獻酬之禮四章言行禮之久筋力雖竭
而式禮莫愆祝致神意以嘏予主人之事五章
言禮樂備舉祭事既畢留同姓而燕之事六章
則言燕私之事而并載燕者之慶辭也愚按詩
中言濟濟蹌蹌蹌蹌莫莫卒度卒獲式禮莫愆

齊穀匡救者威儀之威此德威所致也倉庾之積牛羊之絜俎豆之碩庶飲食之苾芬者物品之豐此政修所致也德與政儀與物內外兩盡而本末兼備故以之交神明則為妥侑為烝嘗以之逮羣下則為獻酌為燕私曰萬壽無疆曰萬壽攸酢曰卜爾吉福曰以綏後祿所謂受福無疆也又按周禮樂師之教樂儀大馭之馭玉路記玉藻言君子佩玉皆曰行以肆夏趨以采齊或謂采齊即楚茨也

序刺幽王也政煩賦重田萊多荒饑饉降喪民卒流亡祭祀不饗故君子思古焉

自此篇至車牽凡十篇似出一手詞氣和平

稱述詳雅無風刺之意序以其在變雅中故
皆以為傷今思古之作詩固有如此者然不
應十篇相屬而絕無一言以見其為哀世之
意也竊恐正雅之篇有錯脫在此者耳序皆

失之

楚茨之詩精深宏博如何做得變雅輔
氏曰精深宏博四字說盡此詩之義誠

敬之至威儀之救鬼神之享福壽之報此其
所謂精深也禮樂之備品物之豐逮及之備
施被之遠此其所謂宏博
也讀者更熟玩而深索之

信彼南山維禹甸

田見反叶
徒鄰反

之昀昀

音

原隰曾孫田

叶

反因

之我疆我理南東其畝

叶滿
彼反

賦也南山終南山也甸治也昀昀墾辟

音貌

孔氏曰
墾耕其

地闢除草
以成桑田也

曾孫主祭者之稱曾重也自曾祖以至

無窮皆得稱之也疆者為之大界也理者定其溝塗

也

劉執中曰疆謂有夫有畛有塗有道有路以經界
之也理謂有遂有溝有洫有澮有川以疏道之也

畝壟也長樂劉氏曰其遂東入于溝則其畝南矣其遂

南入于溝則其畝東矣

此詩大指與楚茨略同此

即其篇首四句之意也

輔氏曰此詩亦是詩人述公
卿有田祿者力於農事以奉

宗廟之祭也

言信乎此南山者本禹之所治

董氏曰雍州之山荆岐既

旅終南惇物則禹固治之矣嚴氏曰言禹甸治之則平水患理溝洫皆在其中愚按禹平水土大舜美其功曰地平天成萬世永賴今考於詩尤信也其見於小雅則有此詩大雅則曰豐水東注維禹之績又曰奕奕梁山維禹甸之魯頌則曰績禹之緒商頌則曰禹敷下土方又曰設都于禹之績可以見禹功之在人心可以見人心之知所本也故其原隰墾闢而我得田之於是為

之疆理而順其地勢水勢之所宜或南其畝或東其

畝也

愚按地之勢東南下水勢皆趨之故順其勢以縱為遂以橫為溝而或南其畝東其畝也

上天同雲雨

于付反

雪雰雰

敷云反

益之以霏

亡革反

霖

音木

既優既渥

叶鳥谷反

既霑既足生我百穀

賦也同雲雲一色也將雪之候如此霏霏雪貌霏霏

小雨貌

陸農師曰三農之事雪則欲盛而徧故言霏霏雨欲微而潤故言霏霏

優渥霑

足皆饒洽之意也冬有積雪春而益之以小雨潤澤

則饒洽矣

彭氏曰上章言地利此章言天時俗云蝗產子於地中至春夏不能出矣一雪入地三

氣逼之深入於地春夏不能出矣一雪入地三尺雪則入地九尺故三白為豐年之兆也

疆場

音亦

翼翼黍稷或或

於六反叶于逼反

曾孫之穡以為酒

食界

必寐反

我尸賓壽考萬年

叶尼因反

賦也場畔也

前漢書注曰至此易主故曰易

翼翼整飭貌或茂或盛

貌畀與也

言其田整飭而穀茂盛者皆曾孫之穡

也

愚按詩人本欲言此章之事而先言首章田畝之整闢疆理次章雨雪之滋生百穀而以此章首二

句承上章之意言之也

於是以為酒食而獻之於尸及賓客也

丘氏曰與尸謂獻熟食并酌齊獻尸是也與賓謂助祭之賓酌齊獻尸尸酌酢賓并祭未燕同姓於寢是也此祭始終用酒食之事愚按三獻尸之後主人亦有獻賓之禮

陰陽和萬物遂而

人心懽悅以奉宗廟則神降之福故壽考萬年也

氏輔

曰首章言我之得以壑辟夫田者禹之功也二章言我之得以生長夫穀者天之賜也此章首句則重言

首章之意二句則重言二章之意可見其不忘所自也第三章方言此乃曾孫之穡鄭氏謂敍獲曰穡是也曾孫既有此穡則以為酒食奉祭祀以盡我之孝心又皆不忘其本之意也至於遠不忘乎大禹甸治之功近不忘乎上天饒洽之賜與夫孝奉宗廟之祭是又皆可以膺受多福而不忝恩按集傳所謂陰陽和者亦承上章雨

雪饒治之意也

中田有廬疆場有瓜

叶反

是剥是菹

側居反

獻之皇祖

曾孫壽考

叶孔反

受天之祜

侯古反

賦也中田田中也菹酢

音醋

菜也祜福也

一井之田

其中百畝為公田內以二十畝分八家為廬舍以便

田事

董氏曰每家廬舍二畝半孔氏曰古者宅在都邑農時則出而就田須有廬舍後漢書注曰井

田法人受私田一百畝公田十畝廬舍直內貴人也公田次之重公也私田在外賤私也於畔上

種瓜以盡地利

王介甫曰地無遺利也

瓜成剝削淹漬以為菹

而獻皇祖貴四時之異物順孝子之心也

祭以清酒從以騂

息營反

牡享于祖考

叶去久反

執其鸞刀

以啓其毛取其血膋

音聊叶音勞

賦也清酒清潔之酒鬱鬯之屬也

嚴氏曰猶龜鬯言爾酒既清烈祖既

載清醑也

鬱鬯者禮家以為釀秬為酒

騂赤色周

煮鬱金香草和之其氣芬芳而條暢也

所尚也

孔氏曰三代各用其所尚之毛色

祭禮先以鬱鬯灌地求神

於陰

董鼎曰酒以灌地降神取其馨香下達

然後迎牲執者主人親執

也鸞刀刀有鈴也膋脂膏也

孔氏曰刀環有鈴其聲中節膋者腸間脂也

啓其毛以告純也取其血以告殺也取其膋以升臭

也合之黍稷實之於蕭而燔之以求神於陽也

孔氏曰楚

語云毛以示物物色也是毛以告純以脂膏合之黍稷實之蕭乃以火燒之合其馨香之氣是升臭也謝

疊山曰祭祀之事各有司存執刀啓毛取血膋必躬親之何也事死如事生事亡如事存子孫之養祖考

必身親其勞自致其力然後盡其心焉耳

記曰周人尚臭灌用鬯臭

絕句一以

鬯字鬱合如字一音開絕句絕句臭陰達於淵泉灌以圭璋用

玉氣也既灌然後迎牲致陰氣也鄭氏曰灌以圭瓚酌鬯始降神也已

乃迎牲於庭殺之天子諸侯之禮也蕭合黍稷臭陽達於墻屋故既奠

然後烝音熱蕭合羶馨同薌香同鄭氏曰莫謂薦孰時也蕭薌蒿也染以脂合黍稷烝

之凡祭慎諸此魂氣歸于天形魄歸于地故祭求諸

陰陽之義也天地陰陽之氣交合便成人氣便是魂精便是魄到得將死熱氣上出所謂魂

升下體漸冷所謂魄降所以祭祀燎以求諸陽灌以

求諸陰也問祖先已死以何而求曰只是以我之氣承接其氣便是有求底道理古人於祭祀極重直

以求之周人求諸陰便焚燎鬱鬯以陰去求之又
曰如言殂落殂升也是魂之遊落是魄之降祭求諸
陽所以求其魂求
諸陰所以求其魄

是烝是享

叶虛良反

苾苾芬芬祀事孔明

叶謨郎反

先祖是皇

報以介福萬壽無疆

賦曰烝進也或曰冬祭名

嚴氏曰烝昇祖妣之烝不
必謂烝嘗之烝輔氏曰若

以為冬祭則其義亦如楚茨二章董氏說上章既言
有酒有牲以享于祖考故此章於是言以是牲酒為
冬祭之烝而飲食苾苾芬芬祭事備著
先祖於是既大且尊而降福無疆也

信南山六章章六句

愚按李寶之曰大夫之祭不
裸不薦血腥而自薦熟始故

名其禮曰饋食天子諸侯則薦熟以前有裸鬯薦
血腥之禮今考此詩與楚茨雖大指畧同而楚茨
獨言薦熟此詩則言清酒血膋意楚茨為天子大
夫之祭禮此詩或諸侯為王朝公卿者之禮歟

序刺幽王也不能脩成王之業彊理天下以奉
禹功故君子思古焉

曾孫古者事神之稱序專以為成王則陋矣

倬

陟角反

彼甫田

叶地因反

歲取十千

叶倉新反

我取其陳食

音嗣

我

農人自古有年

叶泥因反

今適南畝

叶滿彼反

或耘或耔

音子

叶

黍稷薿薿

魚起反

攸介攸止烝我髦士

音毛

鉏里反

賦也倬明貌甫大也十千謂一成之田地方十里為

田九萬畝而以其萬畝為公田蓋九一之法也

鄭氏曰井

田之法九夫為井井稅一夫其田百畝井十為通通稅十夫其田千畝通十為成成方十里成稅百夫其

田萬畝我食祿主祭之人也陳舊粟也農人私百畝而

養公田者也有年豐年也適往也耘除草也耔雖本

也蓋后稷為田一畝三畎廣

去聲

尺深

去聲

尺而播種

上聲

於其中苗葉以上稍耨壠草因墮其土以附苗根壠

盡畎平則根深而能

音耐

風興旱也藝茂盛貌

陳器之

曰按西

漢志葉上有生字墮作墮漢書曰趙過能為代田一
畝三畝歲代處故曰代田古法也耔附根也言苗稍
壯每耨輒附根比歲暑墮盡而根深能風與旱故傲傲而盛也介大烝進髦俊也俊

士秀民也古者士出於農而工商不與焉管仲曰農

之子恒為農野處而不暱其秀民之能為士者必足

賴也即謂此也

國語管仲曰農從事於田野少而習焉其心安焉不見異物而遷焉故其

父兄之教不肅而成子弟之學不勞而能故農之子云云注曰暱近也秀民民之秀出者也輔氏曰言農夫而終之以髦士所以重農也此詩述公卿有田祿者力於農事

以奉方社田祖之祭

輔氏曰楚茨信南山二詩皆是述公卿有田祿者力於農事以

奉其宗廟之祭故首皆推言昔人墾辟之功而我得以耕治以奉祭祀之意甫田之詩乃述公卿有田祿者力於農事以奉方社田祖之祭故首言有年之多與蓄積之富以見於神不可不報之意故言

於此大田歲取萬畝之入以為祿食及其積之久而有餘則又存其新而散其舊以食農人補不足助不給也蓋以自古有年是以陳陳相因所積如此然其用之之節又合宜而有序如此所以粟雖甚多而無

紅腐不可食之患也

謝疊山曰民生於三代之前其命制乎君民生於三代之後其

命制乎天吾求其所以制命之道矣取民常少與民常多斂散得宜豐凶有備新者方收入廩陳者即取

以食農人補不足助不給皆取其陳者也從古以來
豈無水旱霜蝗吾民常如有年者上之人斂散得其
道也愚按歲取萬畝之入取之有常也積粟有餘而
能散以周農則用之合宜也於有餘之中必散舊而
存新則用之有序也存新散舊而無紅腐之患又見其不至於暴棄天物也又言自古既
有年矣今適南畝農人方且或耘或耔而其黍稷又
已茂盛則是又將復有年矣故於其所美大止息之
處進我髦士而勞之也

以我齊

音明 叶韻
咨郎反

與我犧羊以社以方我田既臧農

夫之慶

叶祛
羊反

琴瑟擊鼓以御

牙嫁
反

田祖以祈甘雨以介

我稷黍以穀我士女

賦也齊與粢同曲禮曰稷曰明粢此言齊明便文以

協韻耳犧羊純色之羊也社后土也以句

音龍氏配孔氏曰后

王者地之大名也鄭云社者五土之神能生萬物者也以古之有大功者配之祭法共工氏之霸九州也其子曰句龍能平九州死以配神社而祭之方秋祭四方報成萬物周禮

所謂羅弊獻禽以祀祊

音方是也

夏官大司馬曰中秋獮田羅弊致禽以祊

祊注云羅弊罔止也秋田用罔皆殺而罔止衆皆獻其所獲禽焉祊當為方聲之誤也秋田主祭四方報成萬物臧善慶福御迎也田祖先嗇也謂始耕田者即

神農也周禮籥章凡國祈年于田祖則吹豳雅擊土

鼓以樂田畯是也

孔氏曰謂神農始教造田謂之田祖先為稼穡謂之先嗇神其農業

謂之神農名殊而實同也王介甫曰生為田畯死為田祖若樂工之死而為樂祖也穀養也又

曰善也言倉廩食而知禮節也

言奉其齊

音盛音成

犧牲以祭方社而曰我田之所以善者非我之所能

致也乃賴農夫之福而致之耳又作樂以祭田祖而

祈雨庶有以大其稷黍而養其民人也

胡庭芳曰此章分兩節農

夫之慶以上秋報也琴瑟擊鼓以下又是春祈也彭氏曰齊明犧羊此祀社方之禮也鼓鐘琴瑟此祀田

祖之樂也我田既臧農夫之慶此報於社方者然也
也以祈甘雨介稷黍穀士女此祈於田祖者然也

曾孫來止以其婦子

叶獎反

饁

于輒反

彼南畝

叶滿反

田畯

音俊

至喜攘

如羊反

其左右

叶羽反

嘗其旨否

叶補反

禾易

以鼓反

長畝

同上

終善且有

叶羽反

曾孫不怒農夫克敏

叶母反

賦也曾孫主祭者之稱非獨宗廟為然曲禮外事曰

曾孫某侯某武王禱名山大川曰有道曾孫周王發

是也饁餉攘取旨美易治長竟有多敏疾也 曾孫

之來適見農夫之婦子來饁耘者於是與之偕至其

所而田峻亦至而喜之乃取其左右之饋而嘗其旨

否言其上下相親之甚也

輔氏曰旨則幸而喜矣否則慘然為之不樂也不曰

取而曰攘者以公卿之貴而食農者之粗糲彼必有所不敢獻者故攘而取之以見上下相親如家人父子之無間也呂東萊曰此言省耕之時曾孫在上明者在下田峻往來其間勸勞而撫摩之熙然其若一家也曰攘者喜之甚而取之疾以言其相親無間也既又見其禾之易治竟畝

如一而知其終當善而且多是以曾孫不怒而其農

夫益以敏於其事也

呂東萊曰不曰喜而曰不怒者若不敏於農則怒矣彭氏曰喜

怒非自外至田峻言喜曾孫言不怒則其上下相與皆誠心之至也

曾孫之稼如茨

才私反

如梁曾孫之庾

羊主反

如坻

直基反

如京

叶居良反

乃求千斯倉乃求萬斯箱黍稷稻粱農夫之

慶

叶祛羊反

報以介福萬壽無疆

賦也茨屋蓋言其密比也

孔氏曰謂以茅覆屋言其積聚高大如屋茨耳

梁

車梁言其穹隆也

愚按小戎所謂梁輶是也

坻水中之高地也京

高丘也箱車箱也

此言收成之後禾稼既多則求

倉以處之求車以載之而言凡此黍稷稻粱皆賴農

夫之慶而得之是宜報以大福使之萬壽無疆也其

歸美於下而欲厚報之如此

輔氏曰夫以時歛散補助不足而勞來勸相以

致農夫之敏者固賴乎上之人而火耕水耨沾體塗足勞苦自竭以致禾稼之登者則實農夫之力也歸美于彼而欲報之厚宜矣若夫用其力享其奉而曰予不戕禮則然矣則是末世薄俗之所為古無是事

甫田四章章十句

序刺幽王也君子傷今而思古焉

此序專以自古有年一句生說而不察其下

文今適南畝以下亦未嘗不有年也

大田多稼既種

章勇反

既戒既備乃事

叶上止反

以我覃

以冉反

耜

叶養里反

倣載南畝

叶滿消反

播厥百穀

叶工洛反

既庭且碩

叶常約反

曾孫是若

賦也種擇其種也戒飭其具也覃利倣始載事庭直

碩大若順也

蘇氏曰田大而種多故於今歲之冬

具來歲之種戒來歲之事凡既備矣然後事之取其

利耜而始事於南畝

王介甫曰畝大抵以南為正故每曰南畝

既耕而播

之其耕之也勤而種之也時故其生者皆直而大以

順曾孫之所欲

輔氏曰農夫以百穀庭碩為順曾孫之欲則上之意孚于下而下之意順

乎上 此詩為農夫之詞以頌美其上若以答前篇之

意也

呂東萊曰大田多稼總言之也以下至卒章自始及末以次陳之愚按此章言田事脩飭而苗

生盛美也

既方既皁

叶子苟反

既堅既好

叶許苟反

不稂

音郎

不莠

餘久反

去

起呂反

其螟

莫延反

螣

音持

及其蠹

莫侯反

賊

無害我田穉

音稚田

祖有神秉畀炎火

叶虎委反

賦也方房也謂孚甲始生而未合時

孔氏曰穗上已有孚甲孚者米

外之粟皮甲者在孚外若鎧甲之在人表

實未堅者曰皁

劉執中曰穀粒之生而未充滿

曰稂童梁莠似苗皆害苗之草也

孔氏曰稂莠苗既似禾實亦似粟董

氏曰莠
稗草也

食心曰螟食葉曰螻食根曰蟲食節曰賊皆

害苗之蟲也

孔氏曰此四
種蟲皆蝗也

穉幼禾也

孔氏曰蟲灾
禾穉者偏甚

言其苗既盛矣

鄭氏曰盡生房矣盡成實矣盡堅熟
矣盡齊好矣而無稂莠擇種之善民

力之專時氣
之和所致之

又必去此四蟲然後可以無害田中之

禾然非人力所及也故願田祖之神為我持此四蟲

而付之炎火之中也

輔氏曰既方既卑既堅既好自
未之秀而言以至於成實也其

察之密矣又必無稂莠以分其土力無蟲蝗以戕其
根株然後害不及其穉禾穉禾猶且不害則其庭碩

者可知矣然稂莠則人力足以除之蟲蝗則非人力所及也故願田祖之神持此四蟲付之炎火之中也姚崇遣使捕蝗引此為證夜中設火火邊掘坑且焚

且瘞蓋古之遺法如此

愚按此章言苗既秀實而願其無損也

有渰

於檢反

萋萋

七西反

興雨祁祁雨

于付反

我公田遂及

我私

叶息反

彼有不穫穉此有不斂

力檢反

穉

才計反

彼有遺

秉此有滯穗伊寡婦之利

賦也渰雲興貌萋萋盛貌祁祁徐也雲欲盛盛則多

雨雨欲徐徐則入土公田者方里而井井九百畝其

中為公田八家皆私百畝而同養公田也

方一里為一井其田

九百畝中百畝為公田外八百畝為私田公田以為君子之祿而私田野人之所受也愚按司馬法以六尺為步步百為畝畝百為夫是一畝之田實積百步而方十步一夫之田實積百畝而方十畝為方一百步以九夫為一井則方三夫為方三百步古者以三百步作一里所謂方一里為一井也

把也滯亦遺棄之意也

劉執中曰穧謂穗之低小刈獲之所不及者穧謂刈而遺

忘秉縛之所不及者秉謂求而輦載之所不盡者滯謂刈而折亂秉獲之所不通者皆綠豐稔故也

言農夫之心先公後私故望此雲雨而曰天其雨我

公田而遂及我之私田乎翼怙君德而蒙其餘惠使

收成之際彼有不及獲之穉禾此有不及斂之穡束
彼有遺棄之禾把此有滯漏之禾穗而寡婦尚得取
之以為利也此見其豐成有餘而不盡取又與鰥寡
共之既足以為不費之惠而亦不棄於地也不然則
粒米狼戾不殆於輕視夫物而慢棄之乎

謝疊山曰
三代盛時

君之愛民無所不用其極民之愛君亦無所不用其
極農夫望雨如飢渴之望飲食也惟願其田中之洋
溢今所願者公田之雨優溫霑足其餘波及我私田
也尊君親上之心亦厚矣穉有不穫穡有不斂東有
遺穗有滯此樂歲粒米狼戾之時也農夫何見而乃
能留其餘不盡之和以養鰥寡此上好仁而下好義

也輔氏曰既無狼莠之害又無蟲蝗之害則其不可
無者雨而已故此章又言其望雲與雨先公田而後
私曰如此則成有年矣繆寡孤獨聖人雖不欲有此
等人然亦不能使其無也但發政施人則先及之而
已爾我公田尊君之義也伊寡婦之利及衆之仁也
陳壽翁曰此章欲雨公田不至知有已而不知有君
利及寡婦不至知有已而不知有人忠厚若此其蟲風
之氣象乎愚按此章復願其雨澤溥及而收成有餘也

曾孫來止以其婦子饁彼南畝

子畝並見前篇

田畯至喜來

方禋

音祀因織反

以其騂黑與其黍稷以享以祀

同上

以介

景福

叶筆力反

賦也精意以享謂之禋 農夫相告曰曾孫來矣

劉執

中曰曾孫以其西成乃出郊省民之斂也愚按此詩為農夫之詞故以此為農夫相告言曾孫之來省斂與上篇章音不同也於是與其婦子饁彼南畝之獲者而田畯

亦至而喜之也

王介甫曰喜其趨獲事也

曾孫之來又禋祀四方

之神而賽禱焉四方各用其方色之牲此言騂黑舉

南北以見其餘也

呂東萊曰南方用騂北方用黑孔氏所謂畧舉二方以為韻句是也

以介景福農夫欲曾孫之受福也

愚按卒章言其收穫之後而報祀獲福也

大田四章二章章八句二章章九句

前篇有擊鼓以御田祖之文故或疑此楚茨信

南山甫田大田四篇即為幽雅其詳見於幽風之

末亦未知其是否也

吳伯豐問楚茨以下四篇先生謂即幽雅反覆讀之其辭

氣與七月載艾良邦等篇大抵相類斷無可疑

然前篇上之人以我田

既臧為農夫之慶而欲報之以介福此篇農夫

以雨我公田遂及我私而欲其享祀以介景福

上下之情所以相賴而相報者如此非盛德其

孰能之

輔氏曰上之欲報其下者如此則是君以民為體也下之欲報其上者如此則

是民以君為心也上下之情相賴以為一則君之德固厚而民之德亦厚也李迂仲曰楚茨信

南山甫田大田其始皆言黍稷次言祭祀乃以
福祿終之張文潛曰受莫大之福而其君有安
寧壽考之樂此天下至美極治之時也而其本
於倉廩之盈原隰之治田廬之修耕耘之時而
後及於祭祀禮樂之事也蓋田事備則衣食足
衣食足而禮樂備禮樂備而和平興和平興而
人君有壽考安樂之盛此詩人探其本而要其
終言之序如此詩攷曰蕭望之云及於人衷
此鰥寡上惠下也雨我
公田遂及我私下急上也

序刺幽王也言矜寡不能自存焉

此序專以寡婦之利一句生說

瞻彼洛矣維水泱泱

於良反無韻未詳

君子至止福祿如茨如棘

昧

音

閣

有奭

許力反

以作六師

賦也洛水名在東都會諸侯之處也

問洛水或云兩處曰此只就洛

邑言

泱泱深廣也君子指天子也茨積也韎茅蒐所

染色也

李寶之曰茅蒐一名菼一名菼可以染絳韋昭謂急疾呼茅蒐成韎故因以名其所染也

韎

韎也合韋為之

孔氏曰是蔽膝之衣李寶之曰合韋為之故謂之韎周官所謂

韋弁兵事之服也

愚按韋弁詳見六月常服注

奭赤貌作猶起也

六師六軍也天子六軍

愚按天子六軍出自六鄉蓋一萬二千五百家為鄉凡起

徒役毋過家一人故一萬二千五百家為二軍六軍總七萬五千人也

此天子會諸侯

于東都以講武事而諸侯笑天子之詩言天子至此
洛水之上御戎服而起六師也

瞻彼洛矣維水泱泱君子至止韞

補頂反

琇

必孔反

有琇

賓一反

君子萬年保其家室

賦也韞容刀之韞今刀鞘

音笑也

琇上飾琇下飾亦戎

服也

毛氏曰天子玉琇而琇琇諸侯璆璆而璆璆琇
音選璆音蕩璆音求孔氏曰琇璆甲也黃金謂

璆之璆

瞻彼洛矣維水泱泱君子至止福祿既同君子萬年

保其家邦

叶卜
工反

賦也同猶聚也

瞻彼洛矣三章章六句

詩多有酬酢應答之篇瞻彼洛矣是臣歸美其君君

子指君也當時朝會於洛水之上而臣祝其君如此裳裳者華又是君報其臣桑扈鶯鶯皆然陳壽翁曰講武事而不忘武備乃所以久福祿而保國家之道也知此則後世之廢武備而不戒不虞如晉武者其不能久安長治宜也

序刺幽王也思古明王能爵命諸侯賞善罰惡

焉

此序以命服為賞善六師為罰惡然非詩之

本意也

濮氏曰洛邑初成成王嘗往受諸侯之朝宣王復命諸侯于此序所謂明

王即指此矣安知非當時美之之時何以別其為思古歟以君子至止為諸侯來受爵命

以作六師為使之攝卿士以行軍而因以賞善罰惡稱之何其誕妄而不作也

裳裳者華其葉湑

思呂反

兮我覲之子我心寫

叶想與反

兮我

心寫兮是以有譽處兮

興也裳裳猶堂堂董氏云古本作常常棣也湑盛貌

覲見處安也

此天子美諸侯之辭蓋以答瞻彼洛

矣也言裳裳者華則其葉滑然而美盛矣我覲之子則其心傾寫而悅樂之矣夫能使見者悅樂之如此

則其有譽處宜矣此章與蓼蕭首章文勢全相似輔氏

曰為諸侯而使天子見之悅樂如此是宜有譽處矣先生正以此章與蓼蕭首章文勢相似故知其為天子美諸侯之詩以答瞻彼洛矣也

裳裳者華其黃矣我覲之子維其有章矣維其有

章矣是以有慶叶墟矣

羊反

興也其黃盛也章文章也有文章斯有福慶矣輔氏

曰文

章則德之彌中而彪外者德之彰著如此則國宜其有福慶也

裳裳者華或黃或白

叶僕各反

我觀之子乘其四駱乘其

四駱六轡沃若

興也言其車馬威儀之盛

左

叶祖戈反

之左

同上

之君子宜

叶牛何反

之右

叶羽已反

之右

同上

之

君子有

叶羽已反

之維其有

同上

之是以似

叶養里反

之

賦也言其才全德備以左之則無所不宜以右之則

無所不有維其有之於內是以形之於外者無不似

其所有也

裳裳者華四章章六句

序刺幽王也古之仕者世祿小人在位則讒諂
並進棄賢者之類絕功臣之世焉

此序只用似之二字王說

此山之什十篇四十六章三百三十四句

詩傳通釋卷十三